

MALAYSIA
DEWAN RAKYAT
ATURAN URUSAN MESYUARAT

NASKHAH SAHIH

<http://www.parlimen.gov.my>

HARI KHAMIS, 13 FEBRUARI 2025, PUKUL 10.00 PAGI

Bil. 3

WAKTU PERTANYAAN-PERTANYAAN MENTERI

1. PR-1541-MQT3084
Tuan Khoo Poay Tiong [Kota Melaka] minta **PERDANA MENTERI** menyatakan adakah Kerajaan bersedia meminda Akta Perhimpunan Aman 2012 bagi memudahkan rakyat berhimpun secara aman tanpa perlu memohon kebenaran daripada pihak berkaitan sebelum berhimpun.
2. PR-1541-MQT3094
Tuan Wan Ahmad Fayhsal bin Wan Ahmad Kamal [Machang] minta **PERDANA MENTERI** menyatakan apakah punca ramai pelabur asing menjual pegangan saham mereka dalam negara bagi tempoh kebelakangan ini.

MALAYSIA
DEWAN RAKYAT
ATURAN URUSAN MESYUARAT

NASKHAH SAHIH

<http://www.parlimen.gov.my>

HARI KHAMIS, 13 FEBRUARI 2025, PUKUL 10.00 PAGI

Bil. 6

WAKTU PERTANYAAN-PERTANYAAN MENTERI

PERTANYAAN-PERTANYAAN BAGI JAWAB LISAN

1. PR-1541-L28954
Tuan Roy Angau anak Gingkoi [Lubok Antu] minta **MENTERI KERJA RAYA** menyatakan perancangan Kementerian bagi memastikan Lebuhraya Pan Borneo di Sarawak akan dapat diselenggarakan dengan cara terbaik memandangkan lebuhraya ini tidak bertol dan bergantung kepada Kerajaan untuk dana bagi tujuan penyelenggaraan.
2. PR-1541-L27740
Tuan Haji Muhammad Islahuddin bin Abas [Mersing] minta **MENTERI BELIA DAN SUKAN** menyatakan strategi dan inisiatif Kementerian untuk memantapkan peranan dan fungsi Majlis Belia Malaysia ke arah pemerkasaan belia terutama dari segi penyelarasan pertubuhan belia dan pelajar.
3. PR-1541-L28374
Tuan Oscar Ling Chai Yew [Sibü] minta **MENTERI PERTANIAN DAN KETERJAMINAN MAKANAN** menyatakan tujuan pemasangan Sistem Penentu Kedudukan Global (GPS) pada bot nelayan serta sebab dan cara mengatasi penolakan daripada nelayan terhadap sistem tersebut.

4. PR-1541-L27858

Kapten Azahari bin Hasan [Padang Rengas] minta **MENTERI KOMUNIKASI** menyatakan langkah-langkah terkini yang diambil oleh Kementerian untuk membanteras aktiviti judi dalam talian yang semakin berleluasa, termasuk usaha pemantauan, penguatkuasaan undang-undang dan kerjasama dengan pihak penyedia perkhidmatan internet serta platform digital.

5. PR-1541-L28432

Tuan Haji Manndzri bin Haji Nasib [Tenggara] minta **MENTERI PERUMAHAN DAN KERAJAAN TEMPATAN** menyatakan garis panduan sedia ada pihak KPKT atau PBT berkaitan lokasi pelupusan sampah :

- (a) apakah diperbolehkan tapak pelupusan berada di tepi jalan utama, berhampiran penempatan dan sumber air (sungai); dan
- (b) apakah ia dirujuk kepada keutamaan-keutamaan falsafah pembangunan komuniti dan masyarakat lestari sebagaimana digaris pandu dalam SDG.

6. PR-1541-L28538

Dr. Mohammed Taufiq bin Johari [Sungai Petani] minta **MENTERI KESIHATAN** menyatakan :

- (a) untuk menangani beban pesakit di hospital, adakah Kementerian akan meningkatkan kapasiti *wellness hubs*, serta menggunakan teknologi seperti *telemedicine* ; dan
- (b) apakah perancangan terperinci Kementerian dalam isu beban pesakit yang semakin meningkat di hospital Kerajaan.

7. PR-1541-L28404

Tuan Haji Bakri bin Jamaluddin [Tangga Batu] minta **MENTERI SUMBER MANUSIA** menyatakan adakah Kementerian berhasrat untuk menyediakan satu algoritma khas dalam meletakkan kaedah gaji minimum kepada pekerja industri gig.

8. PR-1541-L29157

Tuan Chong Zhemin [Kampar] minta **MENTERI EKONOMI** menyatakan berapa peratus ekonomi Malaysia dijangka berkembang pada tahun 2025 dan faktor-faktor yang menyumbang kepadanya.

9. PR-1541-L28101
Kapten Dato' Dr. Zulkafperi bin Hanapi (Bersara) [Tanjong Karang] minta **MENTERI PELABURAN, PERDAGANGAN DAN INDUSTRI** menyatakan langkah tambahan yang akan diambil untuk memastikan pelaburan asing terus meningkat pada tahun 2025.
10. PR-1541-L27871
Datuk Hajah Siti Aminah binti Aching [Beaufort] minta **MENTERI KEMAJUAN DESA DAN WILAYAH** menyatakan melalui Projek Pemasangan Lampu Jalan Kampung (LJK) di luar bandar yang bermula dari tahun 2002, berapa jumlah Projek LJK yang telah dipasang sehingga 2024 di Parlimen Beaufort.
11. PR-1541-L28799
Tuan Haji Wan Hassan bin Mohd Ramli [Dungun] minta **MENTERI PERUMAHAN DAN KERAJAAN TEMPATAN** menyatakan perancangan menambahkan jumlah atau meningkatkan kemampuan Regional Forward Bases (RFB) Jabatan Bomba dan Penyelamat Malaysia sebagai langkah proaktif menghadapi risiko bencana banjir yang semakin meningkat di seluruh negara.
12. PR-1541-L28914
Tuan Mohd Sany bin Hamzan [Hulu Langat] minta **MENTERI KESIHATAN** menyatakan dengan pelaksanaan larangan merokok di beberapa kawasan baharu, adakah Kementerian telah mengambil inisiatif untuk meningkatkan kesedaran dengan memasang lebih banyak papan tanda atau tanda amaran jelas yang menunjukkan kawasan tersebut sebagai kawasan larangan merokok baharu.
13. PR-1541-L28694
Tuan Fathul Huzir bin Ayob [Gerik] minta **MENTERI EKONOMI** menyatakan strategi Kerajaan bagi memastikan pemantauan terhadap keberhasilan pembangunan projek-projek ekonomi berskala kecil di bawah RMKe-13 terutama di kawasan luar bandar dan pedalaman mampu memberi kesan pengganda dan limpahan ekonomi kepada golongan rentan, sekaligus merapatkan jurang sosioekonomi yang semakin melebar.
14. PR-1541-L28890
Tuan Mohamad Shafizan Haji Kepli [Batang Lupar] minta **MENTERI KEMAJUAN DESA DAN WILAYAH** menyatakan perkembangan terkini projek pembinaan jalan Serandong - Perpat - Paloh - Batang Maro dan adakah ianya dapat disiapkan menjelang tahun 2027.

15. PR-1541-L29019
Tuan Syed Saddiq bin Syed Abdul Rahman [Muar] minta **MENTERI KOMUNIKASI** menyatakan perincian justifikasi kandungan yang diturunkan dalam platform media sosial sepanjang tahun 2024.
16. PR-1541-L28341
Puan Rodziah binti Ismail [Ampang] minta **MENTERI PERUMAHAN DAN KERAJAAN TEMPATAN** menyatakan kriteria kelayakan untuk terpilih menyertai Program Pemerkasaan Ekonomi Komuniti Bandar yang bertujuan meningkatkan peluang menjana pendapatan usahawan dan taraf hidup masyarakat di bandar terutama golongan B40, seterusnya keluar dari kitaran kemiskinan serta kaedah dan mekanisme mengukur keberkesanannya.
17. PR-1541-L27824
Dato' Haji Abdul Khalib bin Abdullah [Rompin] minta **MENTERI EKONOMI** menyatakan projek dan inisiatif pemangkin utama yang digariskan dalam Pelan Hala Tuju Peralihan Tenaga Negara (NETR) yang direalisasikan hingga kini.
18. PR-1541-L27673
Puan Syerleena binti Abdul Rashid [Bukit Bendera] minta **MENTERI BELIA DAN SUKAN** menyatakan bagaimana Kementerian merancang untuk memaksimumkan kesan peruntukan RM15 juta untuk bola sepak dan RM1 juta untuk kriket dalam membangunkan bakat serta meningkatkan daya saing Malaysia dalam sukan ini.
19. PR-1541-L28091
Dato' Haji Mohd Suhaimi bin Abdullah [Langkawi] minta **MENTERI KESIHATAN** menyatakan apakah usaha mengekang inflasi perubatan yang meningkat 15% tahun lepas seterusnya mengakibatkan kenaikan premium insurans kesihatan.
20. PR-1541-L28608
Puan Vivian Wong Shir Yee [Sandakan] minta **MENTERI EKONOMI** menyatakan secara terperinci bagaimana Kementerian berhasrat untuk melaksanakan program subsidi bersasar untuk petrol dengan berkesan dan cekap, terutamanya di Sabah.

21. PR-1541-L27928

Datuk Dr. Nik Muhammad Zawawi bin Haji Salleh [Pasir Puteh] minta **MENTERI PERTANIAN DAN KETERJAMINAN MAKANAN** menyatakan adakah Kementerian akan mengambil tindakan serius dalam merombak struktur Lembaga Padi dan Beras Negara setelah Malaysia ditempelak dengan data pelarasan SSR oleh Pertubuhan Makanan Dunia (FAO) pada tahun 2023 sebanyak 56.2% sahaja dan 90% daripada pengusaha padi dalam kategori B40 dengan purata pendapatan RM1,000 sebulan.

22. PR-1541-L28175

Tuan Haji Aminolhuda bin Hassan [Sri Gading] minta **MENTERI SUMBER MANUSIA** menyatakan :

- (a) bagaimana Kementerian akan memantau kesan pelaksanaan gaji minimum RM1700 ini terhadap ekonomi dan pekerja selepas ia dikuatkuasakan; dan
- (b) adakah Kementerian bercadang untuk menyemak semula kadar gaji minimum secara berkala.

23. PR-1541-L27656

Tuan Muhammad Fawwaz bin Mohamad Jan [Permatang Pauh] minta **MENTERI KOMUNIKASI** menyatakan apakah Kementerian mempunyai perancangan untuk menapis dan menyekat aplikasi yang menjadi pemangkin kepada masalah gejala sosial yang tidak bermoral seperti *Tinder, Grindr, Omi* dan sebagainya yang tersedia di dalam platform *Google Play* dan *Apple Store*.

24. PR-1541-L28066

Dato' Sri Dr. Wee Jeck Seng [Tanjung Piai] minta **MENTERI PERUMAHAN DAN KERAJAAN TEMPATAN** menyatakan status terkini projek Rumah Mampu Milik (RMM), termasuk jumlah unit yang telah siap dan diserahkan sepanjang tempoh 2024 serta perancangan Kementerian untuk memenuhi permintaan perumahan bagi golongan berpendapatan rendah di kawasan bandar dan luar bandar.

25. PR-1541-L28026

Dato' Wira Dr. Ku Abd Rahman bin Ku Ismail [Kubang Pasu] minta **MENTERI PELABURAN, PERDAGANGAN DAN INDUSTRI** menyatakan :

- (a) status pelaksanaan projek-projek bagi sektor pembuatan berdasarkan kepada jumlah pelaburan RM152 bilion yang diluluskan oleh MIDA pada 2023; dan
- (b) status perlaksanaan projek-projek bagi sektor pembuatan berdasarkan kepada jumlah pelaburan RM84.3 bilion pada tahun 2022.

26. PR-1541-L28475

Puan Wong Shu Qi [Kluang] minta **MENTERI KOMUNIKASI** menyatakan rancangan lanjut Kementerian terhadap platform media sosial yang gagal memohon lesen mulai 1 Januari 2025 dan adakah akses kepada platform yang ingkar akan disekat.

27. PR-1541-L28624

Tuan Mohd Azizi bin Abu Naim [Gua Musang] minta **MENTERI KESIHATAN** menyatakan apakah Kementerian tidak bercadang untuk menyegerakan pelaksanaan platform digital 'Pertukaran Suka Sama Suka' oleh Kementerian bagi memberi keadilan kepada petugas kesihatan di samping mengurangkan beban kakitangan Bahagian Sumber Manusia.

28. PR-1541-L28772

Datuk Seri Haji Jalaluddin bin Haji Alias [Jelebu] minta **MENTERI PELABURAN, PERDAGANGAN DAN INDUSTRI** menyatakan apakah potensi pelaburan multinasional yang boleh dibawa di Negeri Sembilan khususnya di Parlimen Jelebu yang berupaya menyediakan peluang-peluang pekerjaan berkemahiran tinggi dan menjadi pemangkin ekonomi kepada rakyat setempat.

29. PR-1541-L28516

Tuan Haji Abdul Latiff bin Abdul Rahman [Kuala Krai] minta **MENTERI KEMAJUAN DESA DAN WILAYAH** menyatakan berapa jumlah peruntukan yang telah disalurkan di bawah RMKe-12 bagi tujuan kerja-kerja pembinaan dan penaiktarafan Jalan Perhubungan Desa (JPD) mengikut negeri serta projek-projek JPD yang masih dalam proses perancangan, ditangguh atau dibatalkan setakat ini.

30. PR-1541-L28912

Tuan Mohd Sany bin Hamzan [Hulu Langat] minta **MENTERI BELIA DAN SUKAN** menyatakan adakah Kementerian akan menyediakan garis panduan atau strategi khusus bagi memastikan industri sukan negara dapat menarik lebih banyak penajaan, terutamanya dalam memastikan perbelanjaan yang lebih berfokus kepada keperluan penganjuran yang relevan dan pembangunan generasi pelapis.

31. PR-1541-L28339

Dato' Sri Dr. Haji Ismail bin Haji Abd. Muttalib [Maran] minta **MENTERI PERUMAHAN DAN KERAJAAN TEMPATAN** menyatakan :

- (a) apakah Kementerian tidak bercadang untuk meletakkan semua kampung-kampung baru yang diwujudkan di negara ini tanpa mengira sebab penubuhannya di bawah Kementerian ini; dan
- (b) berapa jumlah keseluruhan kampung-kampung baru yang ada.

32. PR-1541-L27816

Dato' Indera Mohd Shahar bin Abdullah [Paya Besar] minta **MENTERI PELABURAN, PERDAGANGAN DAN INDUSTRI** menyatakan dasar yang dilaksanakan Kerajaan bagi menggalakkan syarikat untuk bergerak ke sektor bernilai tinggi bagi menyerap graduan STEM memandangkan cabaran kekurangan tenaga kerja dalam industri yang berteraskan teknologi dan kadar '*skill related underemployment*' yang tinggi.

33. PR-1541-L28501

Tuan Afnan Hamimi bin Dato' Haji Taib Azamuddin [Alor Setar] minta **MENTERI KERJA RAYA** menyatakan pendirian untuk mengembalikan bidang tugas pembersihan jalan-jalan Persekutuan dan pemotongan rumput kepada Kerajaan Negeri Kedah (Syarikat E-Idaman) supaya urusan tersebut dapat dilakukan secara teratur menggunakan sumber manusia dan jentera pembersihan yang mencukupi.

34. PR-1541-L28731

Tuan Riduan bin Rubin [Tenom] minta **MENTERI KESIHATAN** menyatakan berapa bilangan terkini Pegawai Perubatan kelahiran Sabah yang telah memohon dan mengikuti program kepakaran di bawah Program Sarjana Perubatan dan Program Parallel Pathway.

35. PR-1541-L27982

Datuk Che Mohamad Zulkifly bin Jusoh [Besut] minta **MENTERI EKONOMI** menyatakan sama ada fungsi Majlis Tenaga Negara adalah bertujuan menggantikan Majlis Penasihat Petroleum Negara (MPPN) dan sejauh mana negeri-negeri pengeluar minyak dan gas dilibatkan dalam Majlis Tenaga Negara.

36. PR-1541-L28781

Tuan Suhaizan bin Kaiat [Pulai] minta **MENTERI KESIHATAN** menyatakan berkenaan perlantikan pegawai perubatan KKM:

- (a) apakah kriteria untuk penyerapan menjadi pegawai lantikan secara tetap dan kriteria untuk kenaikan pangkat ke tahap JUSA; dan
- (b) berapa orang berpangkat JUSA C dan ke atas dan berapa yang layak tetapi tidak dapat kenaikan yang sewajarnya.

37. PR-1541-L28189
Dr. Hajah Halimah Ali [Kapar] minta **MENTERI PELABURAN, PERDAGANGAN DAN INDUSTRI** menyatakan :
- (a) senarai nama, jenis dan kategori industri yang berada di kawasan Parlimen Kapar; dan
 - (b) senaraikan masalah yang dihadapi untuk meningkatkan keberhasilan industri.
38. PR-1541-L28013
Datuk Seri Panglima Madius Tangau [Tuaran] minta **MENTERI KOMUNIKASI** menyatakan berapa bilangan menara telekomunikasi yang telah diluluskan di seluruh Sabah. Berapa jumlah yang telah siap dibina, dan yang gagal disiapkan mengikut jadual yang ditetapkan. Apakah isu-isu dalam pembinaan menara ini termasuk pembinaan menara di Tuaran.
39. PR-1541-L28316
Dato' Haji Ahmad bin Saad @ Yahaya [Pokok Sena] minta **MENTERI PERTANIAN DAN KETERJAMINAN MAKANAN** menyatakan perancangan Kementerian untuk menurunkan kos benih padi sah kepada RM28 per beg bagi mengurangkan beban yang semakin tinggi terpaksa ditanggung di peringkat pesawah ketika ini.
40. PR-1541-L28121
Datuk Jonathan Yasin [Ranau] minta **MENTERI KESIHATAN** menyatakan sudah waktunya Hospital Ranau dinaik taraf atau dibina baharu yang canggih bagi meningkatkan kualiti perkhidmatan yang dapat disediakan oleh hospital ini supaya para pesakit di daerah ini tidak perlu lagi dirujuk ke hospital-hospital lain di luar daerah Ranau bagi mendapatkan rawatan lanjut.
41. PR-1541-L28258
Tuan Muhammad Ismi bin Mat Taib [Parit] minta **MENTERI PERTANIAN DAN KETERJAMINAN MAKANAN** menyatakan penjelasan berkenaan dakwaan yang tular sebelum ini bahawa Kementerian telah mengarahkan pengilang membeli padi pada harga lantai belian padi iaitu RM1,300 satu tan metrik, berbanding harga semasa iaitu RM1,500 hingga RM1,800.
42. PR-1541-L28224
Tuan Haji Yusuf bin Abd. Wahab [Tanjong Manis] minta **MENTERI KESIHATAN** menyatakan status terkini rancangan pembinaan klinik baharu di Kampung Selalang yang telah diluluskan dalam RMK-10. Apakah masalah yang dihadapi dalam pelaksanaan pembinaan klinik ini.

43. PR-1541-L28762
Puan Yeo Bee Yin [Puchong] minta **MENTERI KESIHATAN** menyatakan:
- (a) jumlah klinik kesihatan di Malaysia mengikut jenis. Berapa antaranya menampung jumlah pesakit yang lebih daripada jenis fasiliti yang disediakan; dan
 - (b) rancangan Kementerian untuk mengurangkan jurang ini.
44. PR-1541-L28364
Dr. Haji Abd Ghani bin Ahmad [Jerlun] minta **MENTERI PERTANIAN DAN KETERJAMINAN MAKANAN** menyatakan adakah Kementerian bercadang untuk membeli syer daripada individu pemegang syer terbanyak dan mengagihkan syer tersebut kepada MADA, KADA dan NAFAS kerana agensi ini berkait secara langsung dengan pesawah padi.
45. PR-1541-L28042
Datuk Seri Utama Ir. Hasni bin Mohammad [Simpang Renggam] minta **MENTERI PERTANIAN DAN KETERJAMINAN MAKANAN** menyatakan bagaimana Malaysia menyesuaikan diri dengan perubahan ekonomi serantau dalam usaha meningkatkan keterjaminan makanan, terutamanya melalui kerjasama ASEAN seperti Pelan Strategik Kerjasama Makanan, Pertanian, dan Perhutanan.
46. PR-1541-L28338
Dato' Sri Dr. Haji Ismail bin Haji Abd. Muttalib [Maran] minta **MENTERI PERUMAHAN DAN KERAJAAN TEMPATAN** menyatakan berapa jumlah peratus golongan B40 yang masih belum mempunyai rumah sendiri dan masih menyewa mengikut kaum di negara ini dan apakah langkah Kementerian dalam menangani isu ini.
47. PR-1541-L28280
Dato Dr. Richard Rapu @ Aman anak Begri [Betong] minta **MENTERI PERTANIAN DAN KETERJAMINAN MAKANAN** menyatakan :
- (a) status terkini penggubalan Rang Undang-Undang Kualiti Benih Tanaman Negara ; dan
 - (b) apakah cabaran spesifik industri benih negara yang hendak ditangani sekiranya RUU ini dibentangkan.

48. PR-1541-L27923

Datuk Dr. Nik Muhammad Zawawi bin Haji Salleh [Pasir Puteh] minta **MENTERI KOMUNIKASI** menyatakan apakah impak jangka pendek dan jangka panjang dalam memastikan kebebasan bersuara rakyat terjamin selepas pindaan Akta Komunikasi dan Multimedia 1998 (Pindaan 2024).

49. PR-1541-L28939

Puan Rodziah binti Ismail [Ampang] minta **MENTERI KESIHATAN** menyatakan tarikh KKM akan mengemukakan permohonan rasmi kepada PDT Gombak untuk mendapatkan secara pemberi milikan tanah di Lot 19048 Ukay Perdana, asalnya dirizabkan untuk balai polis namun telah ditukar di bawah RT MPAJ 2035 untuk dibina klinik kesihatan dengan peruntukan pembangunan RMKe-13.

50. PR-1541-L28986

Dato' Hajah Siti Zailah binti Mohd Yusoff [Rantau Panjang] minta **MENTERI PELABURAN, PERDAGANGAN DAN INDUSTRI** menyatakan langkah yang diambil Kementerian pada tahun ini untuk menarik lebih banyak pelaburan asing ke Malaysia, khususnya dalam sektor teknologi tinggi dan hijau.

51. PR-1541-L27947

Komander Nordin bin Ahmad Ismail TLDM (Bersara) [Lumut] minta **MENTERI KESIHATAN** menyatakan langkah-langkah segera yang telah dan akan diambil oleh Kementerian Kesihatan untuk mengelakkan pesakit terpaksa menunggu lama untuk mendapatkan rawatan khususnya berkaitan pengurusan masa menunggu di unit kecemasan, penambahan katil dan ruang rawatan, pengagihan sumber tenaga kerja perubatan.

52. PR-1541-L27977

Tuan Zakri bin Hassan [Kangar] minta **MENTERI KERJA RAYA** menyatakan berapa peruntukan yang diberikan bagi memperbaiki jalan-jalan Persekutuan di Parlimen Kangar pada tahun 2025.

53. PR-1541-L28583

Datuk Ali anak Biju [Saratok] minta **MENTERI KEMAJUAN DESA DAN WILAYAH** menyatakan status serta huraian terkini projek menaik taraf jalan Bajau-Kupang dan bila tawaran kerja akan dibuat dan jangkaan kerja-kerja menaiktaraf dapat dilaksanakan.

54. PR-1541-L28191

Dato' Sri Doris Sophia anak Brodi [Sri Aman] minta **MENTERI SUMBER MANUSIA** menyatakan langkah Kementerian bagi menangani fenomena hijrah cendekiawan dengan peningkatan tenaga kerja mahir Malaysia yang bekerja di luar negara.

55. PR-1541-L28531

Dato' Seri Dr. Shahidan bin Kasim [Arau] minta **MENTERI KEMAJUAN DESA DAN WILAYAH** menyatakan :

- (a) adakah Kementerian sedar hanya Perlis saja yang tidak mempunyai agensi pembangunan wilayah di negara ini; dan
- (b) adakah Kementerian bersedia mewujudkan sebuah kawasan wilayah pembangunan di Perlis bagi meningkatkan daya saing ekonomi negara lalu memacukan pertumbuhan ekonomi Wilayah Utara Semenanjung Malaysia.

56. PR-1541-L28019

Tuan Zulkifli bin Ismail [Jasin] minta **MENTERI PERUMAHAN DAN KERAJAAN TEMPATAN** menyatakan pendirian KPKT berhubung kontroversi sambutan perayaan Krismas di premis Kementerian mengambil kira garis panduan Majlis Fatwa Kebangsaan dan Mufti Wilayah yang sedia ada.

57. PR-1541-L27765

Datuk Matbali bin Musah [Sipitang] minta **MENTERI KESIHATAN** menyatakan inisiatif Kementerian dalam mengatasi masalah peningkatan kos keseluruhan untuk 3 Blok (D,E,F) di Hospital Beaufort yang dianggarkan sebanyak RM60 juta. Mohon pihak Kementerian memberi cadangan untuk mengatasi masalah ini kerana kepadatan pesakit di blok F telah mengakibatkan ketidakselesaan kakitangan dan juga pesakit.

58. PR-1541-L28385

Datuk Suhaimi bin Nasir [Libaran] minta **MENTERI PERUMAHAN DAN KERAJAAN TEMPATAN** menyatakan adakah Kementerian merancang untuk menyemak dan mengemaskini semula elaun-elaun bagi anggota Jabatan Bomba dan Penyelamat yang telah sekian lama tidak disemak.

59. PR-1541-L27686

Tuan Wan Razali bin Wan Nor [Kuantan] minta **MENTERI BELIA DAN SUKAN** menyatakan apakah langkah yang diambil oleh Kementerian bagi memupuk gaya hidup sihat dengan aktiviti sukan dan rekreasi dalam kalangan belia komuniti bandar dan luar bandar.

60. PR-1541-L28000

Tuan Zahari bin Kechik [Jeli] minta **MENTERI PERUMAHAN DAN KERAJAAN TEMPATAN** menyatakan senarai peruntukan yang telah disalurkan bagi pasar awam di Malaysia dan status pelaksanaan setakat ini.

61. PR-1541-L28102

Tuan Azli bin Yusof [Shah Alam] minta **MENTERI PERUMAHAN DAN KERAJAAN TEMPATAN** menyatakan strategi jangka panjang Kementerian menguatkuasakan peraturan yang lebih fleksibel dan berkesan untuk memastikan kestabilan kewangan dan penyelenggaraan konsisten bagi perumahan berstrata kos rendah yang terkait dengan masalah sistemik disebabkan kegagalan pemilik atau penghuni membayar yuran penyelenggaraan.

62. PR-1541-L27805

Tuan Edwin anak Banta [Selangau] minta **MENTERI KERJA RAYA** menyatakan adakah perancangan untuk memasang *traffic light* atau persimpangan jalan yang lebih strategik ke Pekan Tatau di jajaran Pan Borneo Sibu ke Bintulu kerana P-Turn yang sedia ada terlalu jauh dan tidak sesuai bagi kenderaan berpatah balik masuk ke Pekan Tatau.

63. PR-1541-L27955

Tuan Syahredzan bin Johan [Bangi] minta **MENTERI BELIA DAN SUKAN** menyatakan tindakan, langkah, sokongan dan program yang dilaksanakan untuk membantu Majlis Belia Malaysia (MBM) dan juga Majlis Belia Selangor Daerah Hulu Langat (MBSDHL) dalam membangunkan golongan belia.

64. PR-1541-L27935

Tuan Jamaludin bin Yahya [Pasir Salak] minta **MENTERI KESIHATAN** menyatakan penambahbaikan prasarana klinik kesihatan dan berapa bajet yang diperuntukkan setiap pusat kesihatan desa, daerah dan hospital.

65. PR-1541-L28913

Dato' Muhammad Bakhtiar bin Wan Chik [Balik Pulau] minta **MENTERI KESIHATAN** menyatakan rancangan Kementerian untuk mengurangkan kesesakan di Jabatan Kecemasan di seluruh negara.

66. PR-1541-L28388
Datuk Suhaimi bin Nasir [Libaran] minta **MENTERI PERTANIAN DAN KETERJAMINAN MAKANAN** menyatakan apakah bentuk bantuan dan insentif yang disediakan oleh Kementerian untuk membantu pekebun kecil di Libaran meningkatkan hasil pertanian mereka dan mengatasi cabaran ekonomi yang dihadapi. Berapa banyak bantuan dan insentif tersebut telah disalurkan bagi tempoh 2023 - 2024 kepada Negeri Sabah dan Parlimen Libaran khususnya.
67. PR-1541-L28261
Puan Rodiyah binti Sapiee [Batang Sadong] minta **MENTERI KOMUNIKASI** menyatakan langkah diambil SKMM terhadap penyedia perkhidmatan tanpa lesen, memandangkan semua platform media sosial berdaftar diwajibkan memiliki Lesen Kelas Pemberian Perkhidmatan Aplikasi di bawah Akta Komunikasi dan Multimedia 1998 (Akta 588) mulai 2025.
68. PR-1541-L28151
Datuk Iskandar Dzulkarnain bin Abdul Khalid [Kuala Kangsar] minta **MENTERI EKONOMI** menyatakan status terbaharu pengumpulan data bagi pengklasifikasian pendapatan B40, M40 dan T20 dan bilakah anggaran klasifikasi terbaharu akan diumumkan sebagai panduan umum kepada semua pihak.
69. PR-1541-L28048
Ir. Ts. Zahir bin Hassan [Wangsa Maju] minta **MENTERI BELIA DAN SUKAN** menyatakan :
(a) perancangan dan strategi untuk meningkatkan prestasi pasukan sukan Kabaddi negara di Sukan SEA 2025; dan
(b) perancangan Kementerian untuk menjamin kebajikan para atlet bukan penjawat awam dan bekerja sendiri yang perlu fokus menjalani sesi latihan dan mewakili negara.
70. PR-1541-L28848
Dato' Sri Ismail Sabri bin Yaakob [Bera] minta **MENTERI PELABURAN, PERDAGANGAN DAN INDUSTRI** menyatakan penjelasan mengenai persediaan Kerajaan untuk berhadapan dengan dasar baharu yang bakal diperkenalkan oleh Presiden Amerika Syarikat, Donald Trump yang sebelum ini terkenal dengan mengenakan tarif yang tinggi dan *trade war*.

71. PR-1541-L28230

Dato' Seri Dr. Wan Azizah Dr. Wan Ismail [Bandar Tun Razak] minta **MENTERI PERTANIAN DAN KETERJAMINAN MAKANAN** menyatakan penerokaan kawasan-kawasan di Sabah dan Sarawak sebagai jelapang padi bagi meningkatkan pengeluaran beras negara, sejauh manakah usaha ini menjamin bekalan beras negara dan memastikan harga beras kekal di Semenanjung Malaysia.

72. PR-1541-L29201

Tuan Yuneswaran A/L Ramaraj [Segamat] minta **MENTERI PERUMAHAN DAN KERAJAAN TEMPATAN** menyatakan pendirian Kementerian mengenai perlaksanaan kawalan sewa (*rent control*) di Malaysia dan apakah kajian telah dilakukan bagi menilai impak perlaksanaan kawalan sewa terhadap pemilik rumah, penyewa serta pasaran hartanah secara keseluruhan terutamanya bagi kawasan yang mempunyai kepadatan penduduk yang tinggi.

73. PR-1541-L28351

Tuan Ahmad Fadhli bin Shaari [Pasir Mas] minta **MENTERI SUMBER MANUSIA** menyatakan langkah kerjasama rentas Kementerian bagi menangani kebarangkalian kehilangan pekerjaan dalam kalangan rakyat akibat penerapan teknologi kecerdasan buatan termasuk pekerjaan berkemahiran tinggi dalam sektor awam dan swasta.

74. PR-1541-L28169

Dato' Sri Doris Sophia anak Brodi [Sri Aman] minta **MENTERI KOMUNIKASI** menyatakan langkah-langkah komprehensif Kementerian untuk menangani isu keselamatan dan penyalahgunaan dadah semasa penganjuran konsert di Malaysia. Adakah Kementerian bercadang untuk memperkenalkan garis panduan penganjuran yang lebih ketat, termasuk tindakan penguatkuasaan terhadap penganjur yang gagal mematuhi peraturan.

75. PR-1541-L28002

Tuan Chow Kon Yeow [Batu Kawan] minta **MENTERI EKONOMI** menyatakan status dan pencapaian Pelan Hala Tuju Peralihan Tenaga Negara (NETR) sehingga kini dan juga arah tuju negara terhadap penggunaan nuklear bagi menjana tenaga hijau.

76. PR-1541-L27640
Dato' Sri Sh Mohmed Puzi bin Sh Ali [Pekan] minta **MENTERI KOMUNIKASI** menyatakan adakah Kerajaan berhasrat untuk memperketat penganjuran program berbentuk hiburan seperti menjalankan ujian air kencing secara rawak bagi membendung insiden berunsurkan jenayah termasuk penyalahgunaan dadah sehingga menyebabkan kes maut seperti yang berlaku di Konsert Pinkfish baru-baru ini.
77. PR-1541-L27934
Dato' Sri Ikmal Hisham bin Abdul Aziz [Tanah Merah] minta **MENTERI KOMUNIKASI** menyatakan berikutan kejadian empat orang maut selepas disahkan mengambil pil *Ecstasy* selepas menghadiri konsert Pinkfish, apakah langkah yang dilakukan oleh Kementerian bagi memastikan konsert-konsert hiburan tidak dicemari dengan masalah dadah.
78. PR-1541-L28073
Tuan Ganabatirau A/L Veraman [Klang] minta **MENTERI PERUMAHAN DAN KERAJAAN TEMPATAN** menyatakan adakah Kementerian mempunyai perancangan untuk membina pusat krematorium yang baharu untuk menampung keperluan penduduk yang semakin meningkat di daerah Klang.
79. PR-1541-L28965
Dato' Seri Amirudin bin Shari [Gombak] minta **MENTERI KERJA RAYA** menyatakan status terkini pembinaan Lebuhraya KL-Karak. Apakah persediaan Kementerian supaya warga tempatan yang menduduki kawasan pinggiran jalan sedia ada dibela sekiranya perlu dipindah ke kawasan lain.
80. PR-1541-L28571
Dato' Seri Utama Haji Aminuddin bin Harun [Port Dickson] minta **MENTERI PERUMAHAN DAN KERAJAAN TEMPATAN** menyatakan apakah Kementerian melihat potensi penggunaan rumah modular dan sistem pembinaan pra-fabrikasi untuk mempercepatkan pembangunan perumahan dan mengurangkan kos pembinaan dapat menghasilkan lebih banyak Rumah Mampu Milik.
81. PR-1541-L29067
Dr. Radzi Jidin [Putrajaya] minta **MENTERI EKONOMI** menyatakan :
- (a) laporan lengkap stesen minyak yang terlibat dalam pelaksanaan projek rintis penggunaan kad pengenalan dalam proses pembelian petrol mengikut tarikh pelaksanaan bagi tempoh Januari 2023 sehingga Januari 2025; dan
 - (b) dapatan daripada pelaksanaan projek rintis tersebut.

82. PR-1541-L27618

Tuan Hassan bin Abdul Karim [Pasir Gudang] minta **MENTERI KESIHATAN** menyatakan bilakah Hospital Pasir Gudang akan siap dibina sepenuhnya. Bila pula operasi akan bermula dan berapa kos keseluruhan pembinaan dan kelengkapan hospital tersebut.

83. PR-1541-L28561

Tan Sri Dato' Haji Mahiaddin bin Haji Mohd. Yassin [Pagoh] minta **MENTERI EKONOMI** menyatakan :

- (a) sejauh mana keberhasilan strategi serta inisiatif dalam PuTERA35 untuk menganjak struktur ekonomi Bumiputera agar kekal berdaya saing dengan tumpuan kepada sektor-sektor berimpak tinggi; dan
- (b) status pemusatan Pelaburan Hartanah Berhad dan Ekuinas di bawah Yayasan Pelaburan Bumiputera khususnya dalam menyokong PMKS Bumiputera.

84. PR-1541-L28920

Tuan Hassan bin Saad [Baling] minta **MENTERI EKONOMI** menyatakan usaha mendukung Kedah dalam merealisasikan Pelan Pembangunan Kedah 2035 dan Gagasan The Greater Kedah 2050 seiring dengan prinsip federalisme.

85. PR-1541-L28779

Tuan Lo Su Fui [Tawau] minta **MENTERI KESIHATAN** menyatakan langkah untuk melibatkan fasiliti kesihatan swasta dalam menyediakan perkhidmatan perubatan dengan kos ditanggung oleh Kerajaan. Ini bertujuan mengatasi kos operasi serta penyelenggaraan mesin perubatan di fasiliti kesihatan Kerajaan yang mahal dan usang, terutama ketika perkhidmatan kesihatan awam kini berada dalam keadaan hampir runtuh.

86. PR-1541-L28549

Tuan Tan Kar Hing [Gopeng] minta **MENTERI PERTANIAN DAN KETERJAMINAN MAKANAN** menyatakan tindakan segera yang diambil bagi memulih atau meningkatkan penghasilan beras putih tempatan selepas 20,000 hektar sawah telah musnah dalam banjir di Kelantan dan Terengganu bagi memastikan kestabilan bekalan beras di pasaran.

87. PR-1541-L28838
Datuk Wan Saifulruddin bin Wan Jan [Tasek Gelugor] minta **MENTERI PELABURAN, PERDAGANGAN DAN INDUSTRI** menyatakan apakah langkah Kerajaan untuk membuka ruang ekonomi negara secara unilateral (*unilateral liberalisation*) agar kita lebih berjaya menarik pelabur dan mencipta peluang pekerjaan.
88. PR-1541-L29003
Dato' Haji Adnan bin Haji Abu Hassan [Kuala Pilah] minta **MENTERI KESIHATAN** menyatakan perancangan jangka masa panjang untuk meningkatkan literasi kesihatan dalam kalangan masyarakat bagi menjamin generasi masa hadapan yang sihat dan bebas penyakit kronik sekaligus dapat meringankan beban kos subsidi kesihatan yang ditanggung Kerajaan.
89. PR-1541-L27866
Datuk Haji Awang bin Hashim [Pendang] minta **MENTERI PERTANIAN DAN KETERJAMINAN MAKANAN** menyatakan mekanisme yang digunakan dalam menentukan harga padi semasa dan adakah Kementerian mempertimbangkan untuk mengikat harga padi bagi menjamin pengeluaran serta pendapatan petani.
90. PR-1541-L29029
Datuk Haji Idris bin Haji Ahmad [Bagan Serai] minta **MENTERI KEMAJUAN DESA DAN WILAYAH** menyatakan langkah strategik Kementerian dalam menangani isu kemiskinan di kawasan luar bandar apabila statistik menunjukkan bahawa bilangan Ketua Isi Rumah (KIR) miskin meningkat sehingga 28.4% daripada 146,656 KIR pada tahun 2023 kepada 188,331 KIR pada tahun 2024.
91. PR-1541-L28879
Ir. Ts. Haji Khairil Nizam bin Khirudin [Jerantut] minta **MENTERI EKONOMI** menyatakan adakah wujud penggunaan dana awam di dalam pelaksanaan projek Johor-Singapura Special Economic Zone (JS SEZ) dan apakah perancangan jangka masa panjang Kerajaan bagi mengekang kesesakan lalu lintas yang berpotensi berlaku disebabkan JS SEZ.
92. PR-1541-L28864
Dato' Ngeh Koo Ham [Beruas] minta **MENTERI PERTANIAN DAN KETERJAMINAN MAKANAN** menyatakan mengapa setiap kali pembaharuan lesen bot nelayan dibuat, bot diminta dibawa di pengkalan asal Jabatan Perikanan untuk pemeriksaan dan pengukuran sedangkan rekod dan fail telah dipindahkan ke pengkalan Jabatan Perikanan yang baharu.

93. PR-1541-L28505

Datuk Seri Dr. Ronald Kiandee [Beluran] minta **MENTERI PERTANIAN DAN KETERJAMINAN MAKANAN** menyatakan apakah hala tuju serta perancangan Kementerian berhubung dengan syor menggabungkan semua agensi penguatkuasa dalam sektor agromakanan. Bagaimana Kementerian memastikan keberkesanan penggabungan ini termasuk kos penyelarasan, penyeragaman peraturan, aspek sumber manusia serta garis masa perlaksanaannya.

94. PR-1541-L29170

Dato' Syed Abu Hussin bin Hafiz Syed Abdul Fasal [Bukit Gantang] minta **MENTERI PERTANIAN DAN KETERJAMINAN MAKANAN** menyatakan cadangan Kementerian untuk mewujudkan satu dana khas melalui institusi kewangan negara bagi membantu pengusaha bot perikanan laut dalam Bumiputera mendapatkan geran atau pinjaman mudah untuk membeli bot perikanan laut dalam.

95. PR-1541-L28201

Dato' Seri Hishammuddin bin Tun Hussein [Sembrong] minta **MENTERI SUMBER MANUSIA** menyatakan usaha Kementerian dalam memperkenalkan Program Latihan TVET yang selaras dengan keperluan kecerdasan buatan (AI) bagi meningkatkan kebolehpasaran golongan belia di lapangan pekerjaan serta insentif yang disediakan kepada institusi TVET dan industri untuk mempercepatkan pelaksanaan program berkaitan AI termasuk latihan pensyarah, infrastruktur teknologi dan pembiayaan.

ATURAN URUSAN MESYUARAT DAN USUL-USUL

1. **Dato' Indera Mohd Shahar bin Abdullah [Paya Besar]** akan mencadangkan :

“Bahawa suatu ucapan yang tidak sepatutnya dipersembahkan kepada Kebawah Duli Yang Maha Mulia Seri Paduka Baginda Yang di-Pertuan Agong, demikian bunyinya :

“Ampun Tuanku,

Patik, Yang di-Pertua dan Ahli-ahli Dewan Rakyat Malaysia di dalam Persidangan Parlimen, memohon ampun mempersembahkan suatu ucapan yang ikhlas daripada Majlis Dewan Rakyat mengucapkan berbilang-bilang syukur dan menjunjung kasih Titah Ucapan Kebawah Duli Yang Maha Mulia Seri Paduka Baginda Yang di-Pertuan Agong semasa membuka Penggal Keempat, Parlimen Yang Kelima Belas.”

Menyambung semula perbahasan atas masalah (12 Februari 2025)

- | | | | |
|----|-----------------|--|-------------------------------|
| 2. | (D.R.62/2024) | Rang Undang-Undang BERNAMA (Pindaan) 2024. | Bacaan Kali Yang Kedua |
| | | [Menteri Komunikasi] | |
| 3. | (D.R.63/2024) | Rang Undang-Undang Majlis Media Malaysia 2024. | “ |
| | | [Menteri Komunikasi] | |
| 4. | (D.R.19/2024) | Rang Undang-Undang Mufti (Wilayah-Wilayah Persekutuan) 2024. | “ |
| | | [Perdana Menteri] | |
| 5. | (D.R.47/2024) | Rang Undang-Undang Suruhanjaya Komunikasi dan Multimedia Malaysia (Pindaan) 2024 - Menyambung semula perbahasan atas masalah “Bahawa Rang Undang-Undang ini dibacakan kali yang kedua sekarang,” (10 Disember 2024) | |
| | | [Menteri Komunikasi] | |

6. PR-1541-U(27)369

Dato' Indera Mohd Shahar bin Abdullah [Paya Besar] akan mencadangkan :

"Bahawa Dewan Rakyat menggesa Kerajaan untuk merangka dan membentangkan sebuah perancangan jangka masa panjang untuk 30 tahun ke hadapan dalam mencorak masa depan dan hala tuju negara di mana setiap Rancangan Malaysia 10 tahun, lima tahun dan belanjawan negara akan diselaraskan berpandukan perancangan tersebut.

Walaupun terdapat dasar sedia ada, tetapi perancangan ini tidak cukup kukuh untuk merancang secara holistik dan menyelesaikan '*complexity*' kerana tempoh adalah singkat dan sederhana. Kerajaan boleh mencontohi negara serantau dengan menyelaraskan rancangan 5 tahun dengan strategi jangka panjang, di mana setiap pelan dan dasar harus selari dengan visi jangka panjang.

Penjajaran strategik ini akan meningkatkan daya tahan negara dan meletakkan Malaysia sebagai pemain berdaya saing di peringkat global. Setiap RMK seharusnya berfungsi sebagai batu loncatan untuk mencapai wawasan keseluruhan, membolehkan peruntukan sumber yang lebih berkesan dan responsif kepada cabaran yang muncul."

[Menteri Ekonomi]

7. PR-1541-U(27)370

Dato' Indera Mohd Shahar bin Abdullah [Paya Besar] akan mencadangkan :

"Bahawa Dewan Rakyat menggesa Kerajaan untuk menubuhkan jawatankuasa khas yang terdiri daripada pelbagai Kementerian untuk mengkaji mekanisme memastikan kemampanan sistem penjagaan kesihatan dalam negara.

Perkhidmatan kesihatan awam, yang sudah mengalami tekanan seperti peningkatan permintaan, had kewangan dan ketidaksamaan dalam akses kepada penjagaan. Jawatankuasa khas merentas Kementerian berperanan menangani kebimbangan ini dan meneroka mekanisme pembiayaan yang inovatif dan inklusif.

Dengan mengutamakan kemampanan penjagaan kesihatan, kita boleh memastikan penjagaan kesihatan yang berkualiti kekal dapat diakses oleh semua rakyat, tanpa mengira status kewangan mereka, di samping mengurangkan beban kewangan kepada Kerajaan."

[Menteri Kesihatan]

8. PR-1541-U(27)371

Dato' Indera Mohd Shahar bin Abdullah [Paya Besar] akan mencadangkan :

"Bahawa Dewan Rakyat menggesa Kerajaan untuk mengorientasikan semula dasar penyelidikan dan pembangunan (R&D) untuk memupuk inovasi yang lebih besar dalam syarikat dengan meningkatkan kerjasama dengan universiti.

Dengan mewujudkan hubungan yang lebih kukuh antara penyelidikan akademik dan industri, matlamatnya adalah untuk memacu lebih banyak inovasi yang dikomersialkan yang boleh bersaing di peringkat global.

Pada masa yang sama, Kerajaan perlu meningkatkan fungsi institusi penyelidikan Kerajaan dengan memudahkan pemindahan teknologi global dan membantu syarikat tempatan memanfaatkan teknologi termaju.

Dengan menyediakan akses kepada sumber teknologi sedia ada, Kerajaan membolehkan syarikat memanfaatkan inovasi ini untuk pembangunan produk dan pertumbuhan perniagaan, akhirnya meningkatkan kelebihan daya saing Malaysia dalam pasaran global."

[Menteri Sains, Teknologi dan Inovasi]

9. PR-1541-U(27)372

Dato' Indera Mohd Shahar bin Abdullah [Paya Besar] akan mencadangkan :

"Bahawa Dewan Rakyat menggesa Kerajaan untuk membentangkan kertas putih strategi jangka pendek, sederhana dan panjang bagi menguatkuasakan peraturan yang lebih ketat mengenai penyelenggaraan kenderaan dan keselamatan muatan, meningkatkan pemeriksaan, dan mengenakan penalti yang lebih tinggi bagi pelanggaran peraturan jalan raya.

Statistik menunjukkan 825 kenderaan berat terlibat dalam kemalangan maut dalam tempoh sepuluh bulan pertama tahun ini, menyumbang kepada sebahagian besar daripada 17,905 kemalangan maut.

Latihan tetap untuk pemandu kenderaan berat, ditambah dengan keperluan pelesenan yang dipertingkatkan, akan memastikan amalan keselamatan jalan raya yang lebih baik. Pelaburan dalam infrastruktur dan teknologi jalan raya, seperti sistem keselamatan dalam trak, juga penting untuk meminimumkan risiko. Kempen kesedaran awam dan pengumpulan data yang lebih baik boleh menyasarkan lagi tempoh berisiko tinggi, seperti musim perayaan, untuk mencegah kemalangan dan meningkatkan keselamatan jalan raya secara keseluruhan."

[Menteri Pengangkutan]

10. PR-1541-U(27)384

Dato' Seri Dr. Shahidan bin Kasim [Arau] akan mencadangkan :

“Bahawa Dewan Rakyat ini menggesa Kerajaan supaya mewujudkan pusat benih padi khusus di kawasan utara khususnya di Arau, Perlis bagi membekalkan benih-benih padi yang bermutu tinggi dan membolehkan penyelidikan yang agresif dibuat bagi menghasilkan benih padi baru di samping menyelesaikan masalah ketidakcukupan benih padi di pasaran. Pusat Benih Padi adalah penting untuk mengumpul benih padi yang lebih berdaya komersial, lebih berdaya tahan iklim (*climate resistant*) dan sesuai dengan cuaca di kawasan utara Semenanjung Malaysia.

Pusat ini juga boleh berperanan menjalankan kajian di peringkat serantau dan melibatkan penyelidik daripada negara-negara jiran seperti Thailand, Indonesia dan Myanmar yang mempunyai tanaman baka padi yang berdaya komersial tinggi. Memohon pihak Kerajaan mengambil tindakan dengan kadar segera.”

[Menteri Pertanian dan Keterjaminan Makanan]

11. PR-1541-U(27)385

Dato' Seri Dr. Shahidan bin Kasim [Arau] akan mencadangkan :

“Bahawa Dewan Rakyat ini menggesa supaya Kerajaan mengambil langkah proaktif dalam menangani kes penderaan kanak-kanak yang berlarutan dan sehingga kini belum ada penyelesaian tuntas. Statistik Kementerian Pembangunan Wanita, Keluarga dan Masyarakat menunjukkan sehingga November 2023, kira-kira 1,069 kes penderaan kanak-kanak dilaporkan yang disebabkan oleh kecuaian ibu bapa dan penjaga.

Kanak-kanak adalah masa depan negara. Usaha menangani isu pengabaian dan penderaan kanak-kanak yang dilihat membimbangkan perlu ditangani secara menyeluruh dan membabitkan pelbagai pihak.

Lantaran itu, pihak Kerajaan wajar menangani pantas menghentikan kitaran dera ini dengan target ‘Dera Sifar’ menerusi langkah-langkah proaktif seperti mewajibkan kursus penjagaan anak, mewujudkan sistem pemantauan berkala serta meneliti semula undang-undang serta garis panduan yang berkaitan. Perkhidmatan dalam hal membabitkan perlindungan, pemulihan dan pemeliharaan kanak-kanak perlu diperkukuh dan direalisasikan. Memohon pihak Kerajaan mengambil tindakan dengan kadar segera.”

[Menteri Dalam Negeri]

12. PR-1541-U(27)386

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa supaya Kerajaan menubuhkan badan siasatan bebas bagi mengenal pasti secara terperinci punca utama yang menyebabkan kekurangan bekalan makanan asas seperti beras tempatan, ayam dan telur ayam di pasaran.

Perancangan penyelesaian jangka pendek, jangka panjang yang komprehensif serta penguatkuasaan yang lebih 'keras' terhadap golongan kartel orang tengah antara faktor pengukuhan daya pengeluaran bekalan makanan. Rakyat baik dari kalangan pengguna mahupun pengusaha restoran kecil masih mengeluh dengan permasalahan ini yang menyebabkan kenaikan harga bekalan makanan.

Kerajaan tidak seharusnya melepaskan tanggungjawab menjaga keterjaminan bekalan makanan kepada pengguna sebagai *end user* mahupun menyarankan penyelesaian jalan mudah seperti menambah import makanan tetapi perlu mencari penyelesaian sepanjang rangkaian jaringan bekalan bahan makanan mentah bagi memastikan keterjaminan makanan (*food security*). Memohon pihak Kerajaan mengambil tindakan dengan kadar segera."

[Menteri Pertanian dan Keterjaminan Makanan]

13. PR-1541-U(27)387

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya mengkaji semula peruntukan khas yang boleh diberikan kepada pekebun kecil, penternak dan nelayan yang terjejas akibat situasi iklim yang tidak menentu serta kenaikan harga barang. Kerosakan tanaman dan kematian ternakan sering kali mendatangkan kerugian besar hingga jutaan ringgit setiap kali berlaku bencana alam.

Dengan situasi semasa ekonomi negara yang tidak stabil juga secara tidak langsung akan memberi tekanan kepada kos sara hidup pekebun kecil, penternak dan nelayan yang kebanyakannya bergantung harap kepada sumber pendapatan tersebut sahaja. Maka pemberian peruntukan khas ini dapat menambah baik kehidupan mereka. Memohon pihak kerajaan mengambil tindakan dengan kadar segera."

[Menteri Pertanian dan Keterjaminan Makanan]

14. PR-1541-U(27)388

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya menyegerakan pembinaan dan baik pulih tembok sempadan Malaysia-Thailand supaya merangkumi keseluruhan perbatasan dari Perlis hingga Kelantan dan menyediakan suatu pelan tindakan komprehensif merangkumi semua agensi Kerajaan bagi kawalan sempadan Malaysia-Thailand. Sempadan Malaysia-Thailand adalah sepanjang kira-kira 656km namun hanya 111 km sahaja yang berpagar. Sebahagian tembok sempadan antara Malaysia dan Thailand di sepanjang Laluan Keselamatan dan Pembangunan (KESBAN) dilihat sudah usang manakala peralatan kamera litar tertutup (CCTV) dan alat pengimbas perlu ditambah, dibaik pulih dan dinaik taraf dengan teknologi terkini seperti penggunaan dron.

Beberapa insiden pada masa lalu seperti kes tembakan ke atas pasukan keselamatan negara dan bermaharajalelanya sindiket pemerdagangan manusia seperti yang berlaku di insiden Wang Kelian serta penyeludupan barangan termasuk dadah dan senjata menunjukkan betapa kritikalnya keperluan untuk meningkatkan tahap keselamatan di perbatasan.

Kerajaan Malaysia sebelum ini telah memberikan komitmen untuk membina tembok sempadan tersebut tetapi sehingga terkini masih tiada pelan pembangunan komprehensif dan terperinci yang diumumkan.

Mohon pihak Kerajaan memandang serius perkara ini dengan menyegerakan pembangunan tembok sempadan Malaysia-Thailand secara menyeluruh dan memastikan suatu pelan komprehensif merangkumi semua agensi Kerajaan bagi kawalan sempadan Malaysia-Thailand agar benar-benar berkesan menjamin keselamatan perbatasan negara. Memohon pihak Kerajaan mengambil tindakan dengan kadar segera."

[Perdana Menteri]

15. PR-1541-U(27)389

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya agihan peruntukan pembangunan dan pelaksanaan projek pembangunan di peringkat negeri diberikan mengikut keutamaan dan keperluan Kerajaan Negeri. Berdasarkan pelan RMKe-12, enam negeri kurang membangun akan terus diberi keutamaan dengan agihan sekurang-kurangnya 50% daripada keseluruhan peruntukan Perbelanjaan Pembangunan Asas Persekutuan.

Namun begitu, terdapat beberapa projek yang diluluskan oleh Kerajaan Persekutuan tidak mengambil kira cadangan dan hasrat Kerajaan negeri khususnya di Perlis untuk mempelbagaikan fungsi sesuatu projek sedangkan Kerajaan negeri mempunyai dasar serta hala tuju yang telah mengambil kira pelbagai keperluan dan kehendak semasa serta pada masa hadapan. Misalnya, Projek Lencongan Banjir Barat Timah Tasoh yang telah dilaksanakan pada tahun 2015, di mana dalam pembinaan terowong banjir terdapat skop pembinaan pada item pencahayaan di dalam terowong berjumlah RM300 ribu.

Namun, skop berkenaan telah dikeluarkan atas alasan penjimatan. JPS Perlis selaku pelaksana projek telah membangkitkan perkara ini supaya dikekalkan atas faktor keselamatan dan memudahkan kerja pemantauan serta penyelenggaraan di dalam terowong di masa hadapan. Akan tetapi, ianya masih tetap dikeluarkan daripada skop asal projek. Memohon pihak Kerajaan mengambil tindakan dengan kadar segera."

[Menteri Ekonomi]

16. PR-1541-U(27)390

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya mengkaji dan merancang satu inisiatif khas bagi memastikan setiap rakyat dan keluarga Malaysia terutamanya dari golongan B40 dan M40 mampu memiliki kediaman pertama dengan menyediakan rumah mampu milik berharga RM200,000 dan ke bawah baik di luar dan di dalam bandar. Kerajaan tidak boleh hanya memperkenalkan inisiatif yang hanya sekadar *rebranding* daripada Kerajaan sebelum ini kerana perubahan yang besar perlu dilakukan bagi mendepani kenaikan kos pembinaan disebabkan kenaikan harga barang binaan.

Dasar Perumahan Negara (2018-2025) sendiri memperakui bahawa isu kemampuan memiliki rumah semakin ketara di kalangan rakyat dan impak kenaikan harga rumah yang mendadak turut dirasai golongan M40 selain B40. Inisiatif khas untuk menyediakan kemudahan rumah pertama pada harga di bawah RM200,000 dan ke bawah ini hendaklah dijadikan salah satu sasaran kajian semula Dasar Perumahan Negara dan memerlukan input dari pelbagai agensi dan Kementerian serta pihak bukan Kerajaan dan bukan dari satu Kementerian sahaja.

Isu kemampuan memiliki rumah pertama jika tidak ditangani akan mewujudkan generasi rakyat yang sentiasa menyewa tanpa mendapat peluang memiliki perumahan sendiri. Golongan generasi ini juga akan terus menjadi mangsa kepada harga hartanah yang melambung akibat spekulasi hartanah dan tanpa kawalan harga sehingga menjadikan harga di luar kemampuan sebenar golongan M40 dan B40. Memohon pihak Kerajaan mengambil tindakan dengan kadar segera."

[Menteri Perumahan dan Kerajaan Tempatan]

17. PR-1541-U(27)391

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan bersikap adil dalam mengamalkan kebebasan media di Malaysia. Kerajaan tidak seharusnya menjadikan Suruhanjaya Komunikasi Multimedia Malaysia (SKMM) sebagai alat politik untuk menyekat mana-mana isi kandungan media yang tidak '*pro*' Kerajaan atau tidak sependapat dengan Kerajaan. YAB Perdana Menteri yang memerintah Kerajaan pada masa ini telah berikrar dalam manifestonya untuk memastikan hak kebebasan bersuara dan melindungi kebebasan media.

Namun, keadaan sebaliknya berlaku selepas beberapa bulan beliau membentuk Kerajaan. Lebih mendukacitakan, kebebasan media yang diwar-warkan Kerajaan hanyalah terhad kepada '*pro*' Kerajaan sahaja, manakala parti pembangkang secara halus dikenakan sekatan kepada akses media. Mana-mana media rasmi Kerajaan mahupun swasta tidak diberi kebenaran untuk menyiarkan berita mengenai parti pembangkang mahupun pihak yang menentang Kerajaan.

Oleh hal demikian, Kerajaan digesa supaya berlaku adil dalam menyalurkan maklumat kepada rakyat. Tindakan ini adalah penting untuk memastikan hak kebebasan media tidak dicabul sewenang-wenangnya oleh pihak-pihak tertentu. Memohon pihak Kerajaan mengambil tindakan dengan kadar segera."

[Menteri Komunikasi]

18. PR-1541-U(27)392

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan mengkaji semula kawasan masuk dan keluar sempadan Malaysia-Thailand di Wang Kelian, Perlis. Sebelum ini, penduduk kedua-dua negara boleh menikmati kemudahan bergerak sehingga dua kilometer tanpa menggunakan pasport atau pas sempadan pada hari minggu.

Kuatkuasa itu pernah dibuat bermula tahun 1993 hingga 2015. Akan tetapi, penarikan semula kemudahan kebebasan bergerak ini telah dibuat pada tahun 2015 kerana penemuan rangka manusia mangsa sindiket perdagangan manusia yang dipercayai etnik Rohingya.

Susulan itu, Wang Kelian menjadi pekan mati hingga kini. Kerajaan Negeri Perlis cuba membangunkan semula kawasan pelancongan di Wang Kelian, namun ianya tidak semeriah dahulu.

Justeru itu, Kerajaan diharapkan dapat mengkaji dan mempertimbangkan semula untuk memberi kemudahan bergerak di antara kedua-dua negara seperti sebelum ini. Dengan

kemudahan tersebut, ianya akan dapat menjana semula perkembangan ekonomi khususnya buat penduduk tempatan yang sebelum ini amat rancak sebelum ditutup sepenuhnya pada tahun 2015. Semasa adanya '*Free Flow*' ini, Wang Kelian merupakan satu destinasi pelancongan yang amat meriah dan telah memberi ruang kepada peniaga-peniaga kecil di Perlis dan juga Selatan Thailand menambahkan pendapatan mereka. Memohon pihak Kerajaan mengambil tindakan dengan kadar segera."

[Menteri Dalam Negeri]

19. PR-1541-U(27)393

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa supaya Kerajaan mengkaji semula dasar sedia ada yang berkaitan Warisan Arkeologi Negara dan merangka satu pelan tindakan khusus bagi memartabatkan Warisan Arkeologi Negara yang ditemukan. Penemuan-penemuan arkeologi seperti artifak tembikar, seramik, lukisan purba, rangka manusia purba dan lain-lain artifak amat penting untuk dihayati dan dipelajari kerana data yang dihasilkan dapat membantu merungkai persoalan-persoalan tentang perkembangan hidup dan tamadun manusia silam.

Malahan, ia juga boleh dijadikan sebagai salah satu sumber rujukan pensejarahan negara yang utama. Akan tetapi masih banyak lagi tapak- tapak penemuan arkeologi yang ditemukan tidak dikaji sepenuhnya kerana beberapa faktor terutamanya kekangan kewangan hingga menyebabkan kebanyakan tapak tersebut ditinggalkan tanpa sebarang kajian menyeluruh mahupun pemeliharaan khusus.

Oleh yang demikian, Kerajaan melalui Kementerian Pelancongan, Seni dan Budaya (MOTAC) wajar mengkaji dan merangka satu pelan tindakan bagi memartabatkan Warisan Arkeologi Negara yang ditemukan supaya tapak-tapak arkeologi tersebut dapat dijadikan sebagai subjek kebanggaan dan identiti negara yang berbilang kaum dan agama yang boleh dihayati dan diambil iktibar.

MOTAC amnya boleh mengambil contoh kerangka tindakan daripada negara lain seperti China, Korea, Jepun dan Turki tentang kaedah-kaedah kajian, pemeliharaan dan pemuliharaan yang telah mereka berjaya lakukan melalui kerjasama strategik antara negara.

Hal ini juga sekaligus akan dapat menangani isu kemerosotan minat generasi muda terhadap Sejarah kerana generasi ini dilihat lebih cenderung untuk mengikuti perkembangan teknologi digital dan hiburan. Pembentukan generasi muda yang bakal menjadi pemimpin negara amat penting melalui pendekatan sejarah ini agar semangat kenegaraan atau cinta akan negara itu dapat dipupuk sebaiknya. Memohon pihak Kerajaan mengambil tindakan dengan kadar segera."

[Menteri Pelancongan, Seni dan Budaya]

20. PR-1541-U(27)394

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa supaya Kerajaan menyegerakan kelulusan dan penyaluran peruntukan pembangunan infrastruktur dan kemudahan terutamanya melibatkan penurapan tar di jalan-jalan yang menghubungkan laluan ke perkampungan Orang Asli dan memperbanyakkan pemasangan lampu jalan di Nenggiri, Kelantan.

Dalam Pilihan Raya Kecil (PRK) Dun Nenggiri baru-baru ini, pihak Kerajaan telah mengetahui bahawa kawasan tersebut memerlukan peruntukan pembangunan infrastruktur dan kemudahan yang menyeluruh khususnya di kawasan perkampungan Orang Asli seperti Pos Gob, Pos Tohoi, Pos Simpor dan Pos Pasik.

Oleh yang demikian, Kerajaan melalui Kementerian Kemajuan Desa dan Wilayah (KKDW) wajar mengambil perhatian dan tindakan segera terhadap kekurangan infrastruktur dan kemudahan di kawasan perkampungan Orang Asli di Nenggiri Kelantan kerana mereka juga adalah sebahagian daripada rakyat negara ini yang mempunyai hak untuk menikmati segala kemudahan yang disediakan kerajaan. Memohon pihak Kerajaan mengambil tindakan dengan kadar segera."

[Menteri Kemajuan Desa dan Wilayah]

21. PR-1541-U(27)395

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa supaya Kerajaan Persekutuan melaksanakan pembayaran royalti petroleum kepada negeri Terengganu dan Kelantan sebagai komitmen dalam memastikan pengagihan hasil petroleum yang adil dan saksama.

Tuntutan ini adalah selaras dengan hak rakyat dan negeri sebagaimana termaktub dalam Akta Kemajuan Petroleum 1974. Kedudukan pelantar minyak juga bersetentang dengan kawasan perairan negeri Terengganu dan Kelantan. Prinsip Federalisme perlu dihormati dan dipatuhi Kerajaan Persekutuan dengan menunaikan hak yang dituntut oleh rakyat di kedua-dua negeri tersebut. Memohon pihak Kerajaan mengambil tindakan dengan kadar segera."

[Menteri Kewangan]

22. PR-1541-U(27)396

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa supaya Kerajaan Persekutuan melaksanakan pembayaran Wang Ehsan kepada negeri-negeri di bawah pentadbiran Pembangkang. Pembangunan seimbang antara wilayah amat penting agar rakyat menikmati kemudahan infrastruktur dan kemudahan yang setara. Bantuan Wang Ehsan ini akan dapat membantu negeri-negeri tersebut melaksanakan agenda pembangunan dan kesejahteraan rakyat amnya. Memohon pihak Kerajaan mengambil tindakan dengan kadar segera."

[Perdana Menteri]

23. PR-1541-U(27)397

Dato' Seri Dr. Shahidan bin Kasim [Arau] akan mencadangkan :

"Bahawa Dewan ini menggesa Kerajaan Persekutuan memberikan sepenuh perhatian kepada Beting Patinggi Ali, yang juga dikenali sebagai Luconia Shoals, terletak di perairan Sarawak dan merupakan sebahagian daripada Zon Ekonomi Eksklusif (EEZ) Malaysia. Isu pencerobohan oleh kapal dan pesawat asing, terutamanya dari China telah menjadi persoalan rakyat memandangkan ia berkaitan dengan kedaulatan negara dan kepentingan awam. Sejak tahun 2013, Malaysia telah melaporkan pencerobohan berulang oleh kapal Pengawal Pantai China (CCG) di kawasan ini. Tuntutan China terhadap Beting Patinggi Ali dianggap tidak berasas kerana lokasi geografi kawasan tersebut yang lebih dekat dengan pantai Malaysia (84 nautica miles dari Miri) berbanding dengan tanah besar China (sekitar 1000 nautica miles).

Walaupun Malaysia menganggap Beting Patinggi Ali sebagai miliknya, Kerajaan masih berpendirian terdapat tuntutan bertindih dengan China. China menuntut sebagian besar wilayah di Laut China Selatan berdasarkan garis sembilan dash yang mereka tetapkan, yang telah ditolak oleh Mahkamah Permahan Tetap (PCA) pada tahun 2016. Keputusan PCA ini memberikan Malaysia posisi yang lebih kuat untuk menegaskan haknya di kawasan tersebut.

Untuk memastikan kedaulatan ke atas Beting Patinggi Ali, Malaysia perlu meningkatkan lagi kehadiran aset ketenteraan di kawasan tersebut bagi mengukuhkan tuntutan negara terhadap pulau tersebut dan mempergiatkan keberadaan Malaysia di pulau berkenaan. Mohon kerajaan untuk lebih tegas dalam pendiriannya di mana isu Beting Patinggi Ali adalah hak mutlak Malaysia sepertimana termaktub dalam Konvensi Bangsa-Bangsa Bersatu tentang Hukum Laut (UNCLOS) dan bukannya tuntutan bertindih dengan mana-mana negara asing. Memohon pihak Kerajaan mengambil tindakan dengan kadar segera."

[Menteri Pertahanan]

24. PR-1541-U(27)398

Dato' Seri Dr. Shahidan bin Kasim [Arau] akan mencadangkan :

"Bahawa Dewan ini menggesa Kerajaan Persekutuan memberikan hak royalti kepada negeri Kelantan yang tidak dibayar oleh Kerajaan Persekutuan sering kali menjadi perdebatan hangat, terutamanya berkaitan dengan alasan "lebih 3 batu nautika". Kelantan, sebagai salah satu negeri pengeluar minyak di Malaysia, telah lama menuntut hak royalti minyak yang sepatutnya diterima. Namun, Kerajaan Persekutuan berpendapat bahawa Kelantan tidak layak menerima royalti tersebut kerana kedudukan telaga minyak yang terletak lebih dari tiga batu nautika dari pesisir pantai negeri tersebut.

Kerajaan Persekutuan perlu menyemak atau meminda kembali istilah "tiga batu nautika" yang tidak pernah dinyatakan dalam perjanjian asal dengan Petronas. Berpendapat bahawa Akta 144 tidak menetapkan jarak tertentu untuk hak milik telaga minyak. Tambahan lagi, Telaga minyak yang dimiliki Kelantan terletak kira-kira 80 batu nautika dari pesisir pantai, dan terdapat dakwaan bahawa telaga-telaga ini berada dalam kawasan yang dipertikaikan antara Kelantan dan Terengganu. Ini menimbulkan persoalan mengenai keadilan dan keseragaman dalam pembayaran royalti, terutama apabila negeri-negeri lain seperti Terengganu menerima royalti walaupun telaga mereka juga terletak jauh dari pantai.

Dicadangkan penubuhan jawatankuasa bebas yang terdiri daripada wakil Kerajaan negeri, Kerajaan Persekutuan dan pakar undang-undang untuk meneliti semula perjanjian royalti dan isu-isu berkaitan. Ini dapat memastikan bahawa semua pihak terlibat dalam proses perbincangan yang adil dan terbuka serta mencari penyelesaian yang memuaskan kedua-dua belah pihak. Memohon pihak Kerajaan mengambil tindakan dengan kadar segera."

[Menteri Kewangan]

25. PR-1541-U(27)399

Dato' Seri Dr. Shahidan bin Kasim [Arau] akan mencadangkan :

"Bahawa Dewan ini menggesa Kerajaan Persekutuan untuk mempertimbangkan pembinaan jalan sempadan antara Malaysia dan Indonesia, khususnya di kawasan Sabah dan Kalimantan ini adalah penting untuk pelbagai aspek yang melibatkan ekonomi, keselamatan, dan pembangunan infrastruktur yang akan memulangkan hasil lumayan kepada Malaysia. Didapati bahawa jalan sempadan Malaysia – Indonesia ini akan meningkatkan kebolehcapaian antara kedua-dua negara, memudahkan pergerakan barang dan perkhidmatan. Ini akan merangsang aktiviti ekonomi di kawasan sempadan seperti Kalabakan dan Serudong, serta meningkatkan peluang perniagaan bagi penduduk tempatan.

Diingatkan, dengan pemindahan ibu negara Indonesia ke Kalimantan Timur (Nusantara), terdapat potensi besar untuk pertumbuhan ekonomi di kawasan sempadan. Pembinaan jalan akan membolehkan Sabah memanfaatkan perkembangan ini dengan lebih baik, termasuk dalam sektor pelancongan dan perdagangan rentas sempadan. Jalan sempadan ini dapat menghubungkan kampung-kampung pedalaman dengan bandar-bandar utama, memudahkan akses kepada pendidikan, kesihatan, dan peluang pekerjaan bagi penduduk di kawasan terpencil.

Pembinaan jalan sempadan Malaysia – Indonesia juga berpotensi memperkukuhkan hubungan sosial dan budaya antara masyarakat di kedua-dua negara. Ini termasuk pertukaran budaya melalui pelbagai aktiviti sosial dan ekonomi yang dapat dijalankan lebih mudah dengan adanya infrastruktur yang baik. Memohon pihak Kerajaan mengambil tindakan dengan kadar segera."

[Perdana Menteri]

26. PR-1541-U(27)376

Datuk Seri Ir. Dr. Wee Ka Siong [Ayer Hitam] akan mencadangkan :

"Bahawa Dewan Rakyat ini menggesa Kerajaan untuk segera memperbaharui dasar insentif kenderaan diesel komersial menerusi penetapan piawaian Euro 5 sebagai keperluan minimum menjelang tahun 2026 bagi menggalakkan peralihan yang lebih pantas terhadap penggunaan teknologi rendah emisi dan secara tidak langsung menyumbang sebagai penyelesaian jangka panjang dalam menjaga kualiti udara negara.

Pada ketika ini, negara-negara jiran telah mula mengorak langkah lebih ke hadapan seperti Singapura yang telah lama beralih kepada penggunaan Euro 6 dan Thailand yang menerapkan Euro 5 sebagai piawaian minimum sedangkan Malaysia hanya melaksanakan piawaian Euro 4 mulai Januari 2025 dengan pemberian insentif 50 peratus kepada semua kenderaan yang memenuhi piawaian tersebut.

Ketinggalan ini ternyata menjejaskan daya saing Malaysia di peringkat serantau di samping meningkatkan risiko kesihatan sejagat akibat pelepasan nitrogen oksida dan zarah halus.

Kerajaan wajar mempercepatkan peralihan ini bagi memastikan pengurangan pelepasan bahan pencemar selaras dengan Peraturan-Peraturan Kualiti Alam Sekeliling (Kawalan Kandungan Bahan Api Petrol dan Diesel) 2007. Penguatkuasaan yang ketat dan sokongan infrastruktur yang lebih baik menerusi kerjasama rapat Kerajaan bersama pemain industri perlu disinergikan untuk memastikan peralihan ini kelak berjalan lancar."

[Menteri Sumber Asli dan Kelestarian Alam]

27. PR-1541-U(27)377

Datuk Seri Ir. Dr. Wee Ka Siong [Ayer Hitam] akan mencadangkan :

"Bahawa Dewan Rakyat ini menggesa Kerajaan untuk segera mengkaji semula kadar pelepasan cukai untuk individu dan tanggungan yang kini masih berjumlah RM9,000 dan tidak pernah disemak sejak tahun 2010.

Setelah 15 tahun berlalu, inflasi telah meningkat dengan ketara dan amaun tersebut tidak lagi realistik jika dibandingkan kos sara hidup pada hari ini. Atas pertimbangan tersebut, Kerajaan wajar menaikkan amaun pelepasan diri dan tanggungan ke RM12,000 yang bersamaan dengan RM1,000 setiap bulan, bagi menggambarkan senario serta realiti sebenar kehidupan rakyat Malaysia pada hari ini.

Malah dengan peningkatan amaun pelepasan cukai untuk individu dan tanggungan ini secara tidak langsung akan membantu golongan B40 dan M40 yang amat terkesan dengan inflasi dan seterusnya mencerminkan keprihatinan Kerajaan dalam mengurangkan beban rakyat."

[Menteri Kewangan]

28. PR-1541-U(27)378

Datuk Seri Ir. Dr. Wee Ka Siong [Ayer Hitam] akan mencadangkan :

"Bahawa Dewan Rakyat ini menggesa Kerajaan untuk memartabatkan pengamalan Rukun Negara dalam menjadi tonggak identiti, perpaduan dan keutuhan rakyat Malaysia.

Mutakhir ini, negara disajikan dengan berita dan laporan mengenai kes- kes penyebaran ucapan kebencian, penghinaan dan provokasi yang berbaur perkauman, ketegangan kaum, penipuan dan penegasan unsur- unsur subversif yang berpotensi mencetuskan ketegangan antara kaum dan agama di Malaysia menerusi pengguna di platform media sosial.

Media sosial hari ini juga kian dipenuhi dengan lambakan sikap ketidaksopanan dan kebiadaban dalam perbincangan sehingga menjadi seperti satu kelaziman untuk para pengguna media sosial menggunakan bahasa kasar, lucah malah menyerang peribadi antara satu sama lain sehingga mengabaikan nilai kesopanan.

Hal ini mencerminkan kelemahan penghayatan nilai serta elemen Rukun Negara itu sendiri dalam kalangan rakyat Malaysia dan justeru itu, menjadi tanggungjawab Kerajaan untuk mewujudkan sebuah mekanisme yang lebih berkesan dalam menyuburkan pembudayaan setiap prinsip yang terkandung di dalam Rukun Negara sebagai penawar bagi menangani gejala kebejatan akhlak sebegini di platform media sosial. "

[Menteri Perpaduan Negara]

29. PR-1541-U(27)379

Datuk Seri Ir. Dr. Wee Ka Siong [Ayer Hitam] akan mencadangkan :

"Bahawa Dewan Rakyat ini menggesa Kerajaan untuk mengkaji semula cukai korporat Malaysia yang sehingga kini adalah antara yang tertinggi di Asia Tenggara iaitu sebanyak 24 peratus berbanding negara-negara jiran lain seperti, Singapura (17 peratus), Brunei (18.5 peratus), Cambodia (20 peratus), Vietnam (20 peratus), Thailand (20 peratus), dan Indonesia sekitar 21 peratus.

Perbandingan ini semakin jelas jika dilihat dengan situasi kadar cukai Amerika Syarikat (AS). Pada tahun 2016, cukai korporat mereka adalah sekitar 35 peratus, namun kini cukai korporat mereka telah turun sehingga 21 peratus manakala Malaysia kekal pada kadar sama iaitu 24 peratus sehingga sekarang.

Kadar cukai korporat yang tinggi ini ternyata melemahkan daya saing Malaysia untuk bersaing dengan negara-negara jiran bagi menarik tumpuan pelabur untuk melabur di sini.

Oleh yang demikian, Kerajaan perlu merangka satu kajian yang lebih komprehensif bagi menurunkan kadar cukai korporat ini agar setanding dengan kadar serantau untuk menjadikan Malaysia lebih kompetitif serta berdaya maju dalam meraih tumpuan pelabur antarabangsa yang akhirnya akan menguntungkan negara, peniaga dan rakyat jelata. "

[Menteri Kewangan]

30. PR-1541-U(27)380

Datuk Seri Ir. Dr. Wee Ka Siong [Ayer Hitam] akan mencadangkan :

"Bahawa Dewan Rakyat ini menggesa Kerajaan untuk memastikan kenaikan caj perubatan di hospital dan klinik swasta yang semakin mendapat perhatian di kebanyakan negara termasuk di Malaysia segera ditangani dengan baik oleh Kerajaan memandangkan implikasinya yang besar kepada para pesakit serta sistem kesihatan negara secara keseluruhannya.

Pelbagai faktor mendorong kepada isu ini dengan antaranya ialah kadar caj konsultasi doktor (GP) swasta yang dikawal oleh Akta Kemudahan dan Perkhidmatan Jagaan Kesihatan Swasta (PHFSA) 1998 tidak pernah mengalami sebarang perubahan selama lebih 32 tahun dan menyebabkan pihak terbabit terpaksa menaikkan caj kos operasi yang semakin meningkat, termasuk sewa premis, kos utiliti, peralatan perubatan serta perbelanjaan berkaitan teknologi dan sumber manusia telah meletakkan tekanan besar ke atas klinik swasta.

Situasi tersebut juga diburukkan lagi oleh isu berkaitan Pentadbir Pihak Ketiga (TPA) yang menguruskan pembayaran bagi pesakit yang mempunyai insurans kesihatan yang turut mengalami kenaikan.

Oleh yang demikian, Kerajaan digesa untuk meminda Akta Perkhidmatan Hospital Swasta bagi menetapkan kadar maksimum bagi caj rawatan selain konsultasi doktor, seperti caj penginapan dan penggunaan alat perubatan selain memperkenalkan sistem tiering seperti penarafan hotel bagi membezakan hospital berdasarkan tahap perkhidmatan, membolehkan syarikat insurans menawarkan pelbagai pakej berdasarkan akses kepada hospital tertentu, sesuai dengan kemampuan pelanggan serta mempergiat inisiatif di bawah kerjasama awam dan swasta bagi menyediakan rawatan mampu milik kepada golongan berpendapatan rendah. "

[Menteri Kesihatan]

31. PR-1541-U(27)381

Datuk Seri Ir. Dr. Wee Ka Siong [Ayer Hitam] akan mencadangkan :

"Bahawa Dewan Rakyat ini menggesa Kerajaan untuk mempertimbangkan semula keputusan Kumpulan Wang Simpanan Pekerja (KWSP) yang menjual hampir 10 peratus kepentingan saham ketika harga rendah selepas Disember 2022, sedangkan KWSP telah lama merancang untuk menambah lebih banyak saham Malaysia Airports Holdings Bhd (MAHB) untuk menswastakannya.

Pada 29 November 2022, KWSP telah memiliki 259,917,492 saham iaitu sekitar 15.67 peratus di dalam MAHB dan dalam tempoh satu tahun, KWSP telah menjual 163,363,080 saham, atau hampir 10 peratus kepentingan pada harga sekitar RM6.74 hingga RM7.70 sesaham. Manakala pada 28 Disember 2023 pula, akhirnya KWSP hanya memiliki 96,554,412 saham atau 5.79 peratus sahaja.

Penjualan sebegitu besar dalam tempoh singkat tidak pernah berlaku sebelum ini dan ini menimbulkan persoalan mengapa saham tersebut dijual pada harga rendah tetapi dibeli semula pada harga RM11.00 dengan implikasinya ialah KWSP akan terpaksa membayar tambahan sebanyak RM539 juta sehingga RM696 juta bagi membeli balik saham tersebut.

Justeru itu, Kerajaan digesa untuk mempertimbang dan mengkaji semula keputusan ini dengan lebih berhati-hati memandangkan perkara ini telah menimbulkan keresahan awam kerana membabitkan dana 16.1 juta rakyat Malaysia yang merupakan pencarum KWSP. "

[Menteri Kewangan]

32. PR-1541-U(27)382

Datuk Seri Ir. Dr. Wee Ka Siong [Ayer Hitam] akan mencadangkan :

"Bahawa Dewan Rakyat ini menggesa Kerajaan untuk kembali mempertimbangkan pelaksanaan Cukai Barangan dan Perkhidmatan (GST). Dengan mengambil kira implikasi ekonomi Malaysia yang pada masa ini berada pada tahap yang agak baik serta kestabilan Kerajaan Perpaduan pimpinan YAB Perdana Menteri yang semakin mengukuh, telah ramai pihak termasuklah penganalisis bank berpendapat sekarang adalah masa yang tepat untuk Kerajaan memperkenalkan semula GST.

Menerusi GST, Kerajaan berpotensi untuk meluaskan lagi asas cukai bagi mengurangkan defisit fiskal, mewujudkan ruang utama untuk pelaburan infrastruktur serta menghasilkan peluang bagi mengawal hutang negara dengan lebih baik. Malah, dengan pelaksanaan berperingkat e-invois bermula 1 Ogos 2024, yang juga merupakan antara komponen GST, telah memberikan ruang yang baik untuk Kerajaan melaksanakan kembali GST.

Malaysia tidak harus tertinggal di belakang negara Asia Tenggara lain yang telah melaksanakan GST seperti Indonesia yang melaksanakan Value Added Tax (VAT) pada 1985, Thailand pada tahun 1992 dan Singapura pada 1994 selain GST ini telah dilaksanakan di lebih 170 negara.

Kerajaan boleh menstrukturkan semula GST dengan lebih kemas melalui kerangka dasar yang komprehensif meliputi semua barangan dan perkhidmatan dengan sesetengah barangan boleh dikecualikan, selain satu kadar cukai yang dianggap positif. "

[Menteri Kewangan]

33. PR-1541-U(27)383

Datuk Seri Ir. Dr. Wee Ka Siong [Ayer Hitam] akan mencadangkan :

"Bahawa Dewan Rakyat ini menggesa Kerajaan untuk menimbangkan pengecualian daripada pengeluaran e-Invois kepada Perusahaan Mikro, Kecil dan Sederhana (PMKS) yang mempunyai jualan tahunan di bawah RM500,000 berbanding ketetapan semasa Kerajaan iaitu pengecualian untuk peniaga yang mencatatkan jualan tahunan bawah RM150,000 menjelang pelaksanaan menyeluruh e-Invois bermula 1 Julai 2025.

Pelaksanaan e-Invois ini ternyata telah mewujudkan kebimbangan dalam kalangan para pemain PMKS yang terpaksa menghadapi kekangan kos berikutan perbelanjaan yang tinggi bagi menyediakan sistem pengeluaran serta penyelenggaraan e-Invois di samping risiko margin keuntungan yang rendah.

Peningkatan siling pengecualian e-Invois kepada RM500,000 adalah lebih relevan seperti mana yang pernah dilakukan oleh Kerajaan ketika melaksanakan Cukai Barangan dan Perkhidmatan (GST) sebelum ini dan sekaligus mengurangkan beban lebih banyak segmen pemain PMKS seperti pengusaha yang berniaga dari rumah, ibu tunggal dan peniaga luar bandar yang terpaksa menanggung bebanan implikasi kos yang tinggi.

Oleh yang demikian, Kerajaan disaran untuk mempertimbangkan syor peningkatan pengecualian kepada RM500,000 ini bagi mengurangkan keresahan pemain PMKS dengan pelaksanaan e-Invois yang sebenarnya boleh dielakkan sekiranya Kerajaan memperkenalkan semula GST. "

[Menteri Kewangan]

34. PR-1541-U(27)373

Dato' Sri Dr. Wee Jeck Seng [Tanjung Piai] akan mencadangkan :

"Bahawa Dewan Rakyat ini menggesa Kerajaan untuk melaksanakan kajian secara holistik dan komprehensif bagi menghasilkan benih padi yang berkualiti serta mampu bertahan dalam keadaan perubahan cuaca ekstrem di Malaysia.

Kebelakangan ini perubahan iklim yang ketara telah menjejaskan hasil pengeluaran padi tempatan sebanyak 83,408 tan metrik bersamaan 5.84 juta 10 kilogram pek beras disebabkan oleh musim tengkujuh dan banjir. Penjadualan penanaman padi amat terdedah dengan bencana banjir di musim tengkujuh pada hujung tahun manakala musim penanaman semula padi pada awal tahun pula berisiko diancam keadaan cuaca panas melampau yang perlu diatasi dengan kadar segera.

Sehubungan itu, pihak Kerajaan perlu mengambil langkah yang lebih tegas dan efisien dalam menangani isu ini yang bukan sahaja bagi mempercepatkan pengagihan benih padi kepada pesawah supaya jadual penanaman padi tidak terganggu, malah pihak Kerajaan juga perlu membuat kajian yang teliti bagi menghasilkan benih padi yang lebih berdaya tahan dengan perubahan iklim di Malaysia."

[Menteri Pertanian dan Keterjaminan Makanan]

35. PR-1541-U(27)375

Dato' Sri Dr. Wee Jeck Seng [Tanjung Piai] akan mencadangkan :

"Bahawa Dewan Rakyat ini menggesa Kerajaan untuk menjalankan penelitian semula terhadap kajian bagi persediaan serta perancangan pelan pembangunan pendidikan jangka panjang bagi negara.

Mutakhir ini, kita telah dihabarkan pelbagai peristiwa yang menimbulkan kekusaran masyarakat terhadap ketandusan pembangunan modal insan negara ini terutamanya terhadap generasi baharu yang merupakan generasi yang bakal memimpin dan mentadbir negara tercinta satu hari nanti.

Situasi ini diburukkan lagi dengan statistik kegagalan para pelajar untuk menduduki Sijil Pelajaran Malaysia (SPM) yang hampir setiap tahun mencapai angka yang membimbangkan sehingga mencetuskan kebimbangan. Sejauh mana keseriusan generasi muda ini menilai kepentingan mendapatkan pendidikan untuk membina kehidupan yang lebih baik.

Dalam keadaan negara serantau yang kian pesat membangun, kesediaan dalam melahirkan modal insan menjadi sangat kritikal terutamanya bagi melahirkan generasi yang mampu berdaya saing dan mendepani cabaran serta persaingan dengan negara-negara serantau.

Oleh yang demikian, Kerajaan perlu mengambil pendekatan berstrategi menerusi pembangunan semula pelan pembangunan pendidikan yang lebih efisien bagi memastikan negara kita mampu untuk melahirkan pakej modal insan yang lengkap dan mampu berdaya saing."

[Menteri Pendidikan]

36. PR-1541-U(27)374

Kapten Dato' Dr. Zulkaferi bin Hanapi (Bersara) [Tanjong Karang] akan mencadangkan :

"Bahawa Dewan ini menggesa Kerajaan supaya melaksanakan segera Skim Pembiayaan Kesihatan Kebangsaan demi kepentingan kesejahteraan rakyat serta kemapanan dan kelestarian KKM itu sendiri.

Situasi semasa menunjukkan KKM sangat terbeban dengan belanja mengurus yang sangat tinggi iaitu sehingga 85.07% atau RM38 bilion daripada bajet keseluruhan KKM dan hanya 14.9% yang diperuntukkan untuk bajet pembangunan maka keadaan ini sangat tidak sihat untuk kemapanan dan kelestarian KKM itu sendiri.

Kelemahan, ketidakmampuan dan kegagalan KKM terlihat jelas dengan segala masalah-masalah yang sentiasa menjadi rungutan rakyat dan juga sering diangkat oleh ramai Ahli-ahli Parlimen - seperti kekurangan jururawat, kekurangan doktor dan doktor pakar serta masalah doktor kontrak, Kekurangan ambulans, ketiadaan ubat, alat-alat perubatan terlalu lama, klinik-klinik daif, hospital yang berumur lebih 50 tahun, hospital yang sesak, tiada sistem komputer, pesakit terpaksa menunggu terlalu lama.

Ketahuiilah permasalahan dan segala kelemahan KKM ini sebenarnya adalah manifestasi dari kekangan fiskal KKM itu sendiri. Keupayaan KKM dengan 14.9% bajet untuk Pembangunan adalah sangat-sangat terbatas dan ini boleh menyebabkan kualiti dan mutu perkhidmatan KKM terjejas dan terus dipersoalkan rakyat.

Dengan situasi begini adalah diharapkan penyelesaian segera dan menyeluruh dengan menubuhkan Jawatankuasa Bertindak bagi melaksanakan segera Skim Pembiayaan Kesihatan Kebangsaan."

[Menteri Kesihatan]

37. PR-1541-U(27)400

Datuk Seri Panglima Madius Tangau [Tuaran] akan mencadangkan :

"Bahawa Dewan Rakyat ini menggesa Kerajaan menerima kewujudan Seksyen (1) Perkara 112C Bahagian 4 Jadual Kesepuluh dan Seksyen (2) Bahagian 4 Jadual Kesepuluh dalam Perlembagaan Persekutuan serta penguatkuasaannya dan menerima hakikat bahawa hak ini adalah hak-hak Perlembagaan Rakyat Sabah.

Menerima juga hakikat bahawa kekeliruan dalam pelaksanaan hak-hak perlembagaan ini dan bahawa selama 44 tahun (1974 – 2018), kadar pemberian khas di bawah peruntukan tersebut gagal dikaji oleh Kerajaan Persekutuan.

Memperakui langkah-langkah yang telah diambil oleh pihak Kerajaan selepas penubuhan Kerajaan Pakatan Harapan 2018 sehingga kini iaitu bermula dengan menaikkan pemberian kepada RM53.4 juta, kemudian dinaikkan Kerajaan Perikatan Nasional ke RM125.6 juta, pada tahun 2023, dan kemudian Kerajaan Madani naikkan kepada RM300 juta dan baru-baru ini dinaikkan lagi kepada RM600 juta.

Dan menerima hakikat bahawa semua langkah-langkah ini bersifat sementara (interim) sebelum Kerajaan Sabah dan Kerajaan Persekutuan untuk melaksanakan hak Perlembagaan Rakyat Sabah sepenuhnya.

Menerima hakikat bahawa pelaksanaan ini mengambil masa begitu panjang sehingga sekarang iaitu negara Malaysia sudah berusia 61 tahun. Maka, Tuaran ingin mengusulkan supaya Dewan yang mulia ini membuat Keputusan untuk melaksanakan Hak Perlembagaan Rakyat Sabah ini secara tuntas termasuk meminda perkara 97(1) Perlembagaan Malaysia untuk membolehkan kerajaan Sabah memungut 40% daripada pungutan hasil Persekutuan daripada Sabah secara langsung."

[Perdana Menteri]

38. PR-1541-U(27)401

Datuk Seri Panglima Madius Tangau [Tuaran] akan mencadangkan :

"Bahawa Dewan Rakyat ini menggesa Kerajaan Menerima Sejarah perang saudara di Selatan Filipina pada awal 70-an yang mengakibatkan ribuan pelarian perang dari Filipina melarikan diri ke Sabah. Menerima hakikat bahawa Pertubuhan Bangsa-Bangsa Bersatu (PBB) melalui Suruhanjaya Tinggi Persekutuan Bangsa-Bangsa Bersatu Untuk Pelarian (UNHCR) telah turun padang dan membantu pelarian ini dengan mewujudkan sekurang-kurangnya lima (5) skim penempatan pelarian di Sabah (Telipok, Kinarut, Kampung Bahagia Sandakan, Kampung Selamat Semporna dan Kampung Hidayat Tawau).

Dan menerima hakikat Kerajaan Sabah telah bekerjasama dengan UNHCR sehingga mewujudkan sebuah bahagian di Jabatan Ketua Menteri untuk menguruskan penempatan UNHCR ini.

Menerima juga hakikat apabila setelah UNHCR menyerahkan penempatan ini kepada Federal Task Force di bawah Majlis Keselamatan Negara, terdapat keclaruan dari segi urusan tadbir pelarian perang Filipina di Sabah, sehinggakan penempatan mereka telah bercampur aduk dengan mereka yang bukan pelarian yang menyebabkan banyak masalah dari segi urusan tadbir kewarganegaraan dan pelbagai aspek bantuan kemanusiaan.

Menerima hakikat bahawa pelarian perang Filipina ini telah diberi pelbagai dokumen bermula dengan kad burung-burung, kad banci dan selepas itu dokumen IMM13 sehingga sekarang. Menerima juga hakikat bahawa pelbagai pendekatan untuk menaik taraf bentuk dan cara pengeluaran dokumen ini telah banyak dipolitikkan dan akhirnya kini tidak ada kata putus apakah dokumen baru yang diberikan kepada golongan pelarian perang Filipina ini.

Menerima juga hakikat bahawa satu Suruhanjaya Siasatan Diraja telah ditubuhkan oleh Parlimen Malaysia mencari penyelesaian tuntas terhadap kehadiran golongan pelarian perang Filipina di Sabah, namun itu pun telah gagal memberi apa-apa penyelesaian, Malah ramai yang menganggap langkah ini sebagai mainan politik semata-mata.

Oleh sebab itu, Tuaran mengesyorkan supaya Dewan yang mulia ini membahaskan masalah pelarian perang Filipina dengan mengambil kira bagaimanakah masa depan mereka yang kini sudah tiga generasi beranak pinak di Sabah sehingga Kerajaan dapat mengambil Tindakan yang tegas sebelum masalah ini menjadi lebih besar yang boleh menggugat kestabilan dan kedaulatan negara."

[Perdana Menteri]

39. PR-1541-U(27)402

Datuk Seri Panglima Madius Tangau [Tuaran] akan mencadangkan :

"Bahawa Dewan Rakyat ini menggesa Kerajaan Menerima hakikat bahawa kos pembekalan elektrik (penjanaan, penghantaran dan pengagihan) di Sabah adalah lebih tinggi daripada kadar jualan seunit elektrik menyebabkan Sabah Electricity Sdn. Bhd (SESB) mengalami kerugian dan terpaksa bergantung kepada subsidi sokongan tarif (TSS) daripada Persekutuan dengan kadar RM850 juta setahun.

Menerima juga hakikat bahawa Kerajaan perlu mengambil langkah-langkah bagi memastikan penjanaan elektrik mencapai 40% rizab margin dan kos pembekalan elektrik berada di bawah paras jualan untuk mengurangkan beban Kerajaan Persekutuan dalam menampung subsidi sokongan tarif (TSS).

Oleh itu, maka dengan ini Tuaran mengesyorkan agar Dewan yang mulia ini dapat membahaskan langkah-langkah yang boleh diambil sehingga Kerajaan dapat mencari jalan penyelesaian yang tepat untuk menstabilkan bekalan elektrik di Sabah."

[Menteri Peralihan Tenaga dan Transformasi Air]

40. PR-1541-U(27)403

Datuk Seri Panglima Madius Tangau [Tuaran] akan mencadangkan :

"Bahawa Dewan Rakyat ini menggesa Kerajaan Menerima hakikat bahawa import makanan negara masih lagi tinggi termasuklah makanan ternakan.

Dan menerima hakikat bahawa tanah yang masih luas untuk dimajukan sebagai tanah pertanian terdapat di Sabah dan Sarawak.

Menerima juga hakikat infrastruktur perhubungan masih lagi pada tahap yang rendah menyebabkan pelbagai usaha untuk meningkatkan keterjaminan makanan terhalang.

Maka itu, Tuaran mengusulkan agar Dewan yang mulia ini ditangguhkan untuk membincangkan langkah-langkah dalam mengatasi dan menaik taraf jalan-jalan pertanian di Sabah dan Sarawak."

[Menteri Pertanian dan Keterjaminan Makanan]

41. PR-1541-U(27)404

Datuk Seri Panglima Madius Tangau [Tuaran] akan mencadangkan :

"Bahawa Dewan Rakyat ini menggesa Kerajaan Menerima Hakikat bahawa kawal selia bekalan elektrik di Sabah telah pun diserahkan kepada Kerajaan Sabah daripada Kerajaan Persekutuan selepas Kelulusan Rang Undang-Undang Pihak Berkuasa Tenaga Boleh Baharu (Pindaan) 2023 (Akta 725) dan Rang Undang-Undang Pihak Berkuasa Pembangunan Tenaga Lestari (Pindaan) 2023 (Akta 726) dalam Dewan Rakyat pada 2023.

Menerima hakikat penyerahan kawal selia telah dimuktamadkan selepas Dewan Undangan Negeri (DUN) Sabah meluluskan tiga Rang Undang-Undang Perlembagaan Negeri Sabah pada 3 Januari 2024 berkaitan pengambilalihan kuasa kawal selia bekalan elektrik daripada Kerajaan Persekutuan membabitkan RUU Bekalan Elektrik 2024, Tenaga Boleh Baharu 2024 dan RUU Suruhanjaya Tenaga Sabah (Pindaan) 2024.

Dan menerima hakikat bahawa kawal selia bekalan elektrik di Sabah kini berada di bawah Suruhanjaya Tenaga Sabah (ECoS), manakala Wilayah Persekutuan Labuan masih di bawah seliaan Suruhanjaya Tenaga (ST) Malaysia.

Menerima juga hakikat bahawa Syarikat Sabah Electricity Sdn. Bhd. (SESB) merupakan satu-satunya Syarikat utiliti yang membekalkan tenaga elektrik kepada Wilayah Sabah dan wilayah Persekutuan Labuan.

Dan menerima hakikat bahawa geografi Labuan adalah lebih dekat dengan Sabah berbanding dengan Semenanjung Malaysia.

Justeru, Tuaran mengesyorkan agar Dewan yang mulia ini ditangguhkan bagi membuat keputusan pemindahan kawal selia bekalan elektrik Labuan daripada ST kepada ECoS bagi memudahkan pemantauan, meningkatkan kecekapan pengurusan serta mempermudah segala urusan dan menjimatkan kos."

[Menteri Peralihan Tenaga dan Transformasi Air]

42. PR-1541-U(27)405

Datuk Seri Panglima Madius Tangau [Tuaran] akan mencadangkan :

"Bahawa Dewan Rakyat ini menggesa Kerajaan Menerima hakikat Sejarah bahawa Pulau Labuan diserahkan oleh Kerajaan Sabah menjadi Wilayah Persekutuan dengan niat suci untuk tujuan membangunkan Labuan dengan pesat.

Menerima hakikat Kerajaan Persekutuan telah gagal membangunkan Labuan termasuk menyediakan utiliti bekalan air dan elektrik.

Menerima hakikat bahawa rakyat Labuan adalah juga rakyat Sabah yang masih terikat dengan adat istiadat Sabah dan oleh itu masih lagi memerlukan perkhidmatan sistem Mahkamah Anak Negeri dan seterusnya memerlukan bimbingan dan perkhidmatan di pelbagai agensi Kerajaan Sabah.

Menerima hakikat bahawa penyerahan Labuan sebagai Wilayah Persekutuan telah dibuat tanpa mengambil kira kesan terhadap persempadanan Sabah.

Dan menerima hakikat penyerahan Labuan sebagai Wilayah Persekutuan tidak diberi pampasan walau satu sen pun kepada Sabah.

Menerima hakikat bahawa Pulau Labuan terlalu dekat dengan Sabah dan penduduk serta rakyat Labuan mempunyai ikatan yang sangat kuat dengan penduduk Sabah.

Maka dengan itu, Tuaran menyusulkan di Dewan yang mulia ini agar Kerajaan Persekutuan mengembalikan semula Labuan kepada Sabah."

[Perdana Menteri]

****UCAPAN-UCAPAN
(PERATURAN MESYUARAT 17)
(KAMAR KHAS)**

Ahli Yang Berucap	Tajuk Ucapan	Menteri Yang Bertanggungjawab
YB Dato' Seri Dr. Shahidan bin Kasim (Arau)	1. Isu Kenaikan Harga Tambang Bas Sekolah Naik	1. YB Menteri Pengangkutan
YB Dato' Mohd Isam bin Mohd Isa (Tampin)	1. Pusat Agrosains Pintar Universiti Malaya (UM), Gemas 2. Kejadian Banjir dan Cadangan Pelaksanaan Projek Rancangan Tebatan Banjir (RTB) di Pekan Gemencheh	1. YB Menteri Pendidikan Tinggi 2. YB Menteri Peralihan Tenaga dan Transformasi Air

**** Ucapan Di Bawah Usul Berkenaan Perkara Tadbir Kerajaan (Peraturan Mesyuarat 17)**